

四庫全書

史部

欽定四庫全書

浙江通志卷一百六十五

人物二

忠臣三

台州府

三國吳

張悌

兩浙名賢錄字巨先臨海人歷官丞相天紀四年晉師伐吳孫皓使悌督沈瑩諸葛靚師渡江

逆戰吳軍大敗諸葛靚與五百人退走使人迎悌悌不肯去靚自往牽之謂曰國家存亡自有大數

豈卿一人所支何自取死為悌曰我童兒時便為卿家丞相所拔常恐不得其死負名賢知顧今以身殉社稷復何遁邪靚流涕放

之去百餘步已見為晉軍所殺謹按三國志注襄陽記悌襄陽人而赤城志及府縣諸志俱以為臨海人存以俟考

宋

江仲明

宋史詹良臣傳仲明台州人宣和寇亂載老母逃山澗中猝遇寇於東城之岡逼使就降

仲明義不辱奮起罵賊死之丞相呂頤浩誅以文

蔣煜

赤城志仙居人有文學宣和寇亂與煜遇欲妻以女煜拒之脅以拜亦不從寇曰吾戮汝矣煜

仲頸就刃訾聲不絕煜性滑稽其臨事有立如此

王衡

赤城志字平仲臨海人大觀中舉八行歲貢後死方臘之亂賊首聞之自戮其黨數人曰何敢

殺王
佛子

張埏

徐一夔張氏家譜臨海人靖康之亂從參政謝克家與金人戰江上死節

左瑁

赤城志字文琰黃巖人瑤之弟為賀正書狀官死於難

陳克

台州府志字子高臨海人貽序子博學能詩薦為刪定官尚書呂祉帥建康辟致為屬後祉參

督府謀議復從至淮西紹興間鄺璠叛殺祉克奮勇出戰兵敗就擒叱令屈膝克曰吾宋臣也寧為珠碎不為瓦全賊積薪焚之克罵不絕口聲如震雷眾懼羅拜舉酒酹曰真忠臣也軍民聞之號慟如喪所親

張玘

台州府志字子佩寧海人嘉熙進士歷官浙西憲幹伏闕三上書言天下計斥死嶺表

張華宗

仙居縣志字君實寶祐間以明經補國學除杭州教授轉揚州臨江謹身率士所至有聲

開慶元年元兵壓境翼同官拒守久之臨江陷元兵火文廟大呼曰不降者我也當速殺曷為令先聖無依耶遂遇害詔謚忠烈賜大夫秩

杜澣

宋史鄒淵傳澣字貴卿丞相範從子德祐元年有詔勤王澣時宰縣糾集民兵得四千人文天

祥開闢平江往附焉時陳志道等贊天祥出使澣力爭不可已而天祥北行無敢從者澣獨慨然請行特改兵部架閣從京口以計賂守夜劉千戶得官銓脫天祥偕走淮甸由海道以達永嘉益王即位授司農卿尋往溫台招集兵財福安陷與天祥相失久之奉命復入天祥幕及空坑兵敗入與跋

涉以出徑趨厓山兵潰被執以憂憤卒

王珏

赤城新志字叔寶仙居人咸淳進士德祐初以太學博士權知台州與陳仁玉築城浚濠堅壁

以守城陷赴泮水死寇兵至取首級以獻功其姪賓服珏衣冠自殘以全珏遺體

邵困

赤城新志字叔魯臨海人咸淳進士歷本州教授元兵臨城火學宮端坐而死

牟大昌

台州府志字逢明黃巖人宋末應文大祥檄與姪天與聚義兵勤王浙東提刑杜淵辟大

昌為都將天與副之元兵陷台州率眾禦之題其幟曰大宋臣牟大昌義兵力戰而死從妹則娘投

崖死兄士伯二女皆自經宗族男女死者不可勝計

趙時栗

仙居縣志字寬甫咸淳進士授海鹽主簿募民與元兵對壘者二旬食盡度不能支遂策

馬突入敵營手刃數騎而死

丁衡

台州府志天台人咸淳辛未進士赴江西提刑任途遇元兵不屈而死弟衡亦辛未進士歷官

校書郎以賈似道當國致仕宋亡縞素終身累召不起

高申甫

舊浙江通志字宣卿仙居人由武科除景陵令多惠政元兵至率民力戰死之

徐副尉

天台縣志失其名元兵破臨安宋幼主由慶元南奔元兵追弗及分兵經天台趨寧海邀

之副尉率鄉兵拒於關嶺元兵不能度宋主得浮海去元兵怒從別道抵台邑徐氏男女無少長皆

被害鄉人作大墓瘞之獨乳母王氏抱所乳兒歸寧得免三傳至善述始大顯

張和孫

雨浙名賢錄字哲齊臨海人文天祥自通州泛海過其家約舉義兵將取明州不果後張

弘範入寇見壁間檄捕得之哲齋知不免語弘範曰吾生為宋民死為宋鬼何怪我為遂遇害

趙孟頫

嘉靖浙江通志宋宗室家黃巖文天祥見之曰瑚璉器也後天祥開閩江東浙西俱辟以

行及召赴闕孟頫留吳中宋亡元兵執孟頫欲官之固辭以疾遂去吳依親友以居絕口不談宋事及天祥卒為文祭之慟絕復蘇臨終口占曰王室之懿文山之客一朝從容千古忠赤端坐拱手而逝所著詩文名湖山汗漫集

元

林夢正

輟耕錄字古泉黃巖人以著述薦擢溧陽教授賊寇溧陽獲賊魁張某問之曰我父為軍

千戶紅巾入境逼我父為帥父以年老令我代之夢正罵曰爾祖父世為國臣而爾忍從賊耶既而

賊勢復盛竟奪張去下令曰生得林教授者有賞
夢正匿他處搜得之張曰前日罵我者非爾耶降
我則俾爾為元帥夢正
終不屈縛於樹殺之

潘伯修

赤城新志字省中黃巖人嘗三舉於鄉試春
官卒不遇遂隱居教授以著書為事旁通天

文地理律歷之學為詩文皆寓微意曰文章不闢
世教雖工無益也方國珍寇海上浙江參政多爾濟
巴勒總兵至將盡屠邊海之民伯修挺身率父老
請軍前力爭曰倡亂者獨國珍爾吾民無罪也乃
得免後竟為國珍所害台州府志方氏刼致
慶元欲使長幕府力辭歸使盜待諸隘殺之

陳恢

兩浙名賢錄字仲廣黃巖人至正庚寅方國珍
寇海上境內騷動恢所居僅一里聚其族人及

鄉之好義者禦之不克寇以利誘之恢輒罵不從
既而與戰於白楓河宗族死者八十餘人寇勢益

盛恢自度終不能敵
逃入山中以憂憤卒

洪世安

臨海縣志字用之至正十三年方國珍陷台州世安率鄉勇阻守三江賊猝至寡不敵衆

乃夜縛田中粟桿萬餘各挿火炬賊疑為兵至遂退世安率衆追十餘里後賊知悉衆來攻遂被執臨死罵不絕口明太祖遣朱亮祖平國珍至台訪世安忠義欲官其子儀百戶辭不受遂世免其徭

台哈布哈

元史本傳字兼善巴約特氏初名達布哈文宗賜今名父塔布台仕台州錄事判官

遂居於台年十七浙江鄉試第一明年對策賜進士及第授集賢修撰順帝即位出僉河南司事轉江浙行省左右司郎中浙西大水害稼台哈布哈力言於中書免其租至正元年除紹興路總管革吏弊除沒官牛租令民自實田以均賦役行鄉飲酒禮教民興讓越俗大治黃巖民方國珍為亂台哈布

哈上招捕之策不聽除江東廉訪使國珍入海燒掠沿海州郡十一年詔博囉特穆爾為江浙行省左丞總兵至慶元以台哈布哈諭知賊情狀遷浙東道宣慰使都元帥分兵於温州使夾攻之國珍寇溫台哈布哈縱火筏焚之遁去既而博囉特穆爾戰潰被執為國珍飾詞上聞遣大司農達實特穆爾等至黃巖招之國珍兄弟皆羅拜退止民間小樓台哈布哈欲命壯士襲殺之達實特穆爾曰我受詔招降公欲擅命耶乃止檄台哈布哈親至海濱散其徒眾拘其海舟兵器國珍兄弟授官有差遷台哈布哈台州路達嚕噶齊十二年國珍復入海以叛台哈布哈自分以死報國發兵扼黃巖之澄江而遣義士王大用抵國珍示約信使之來歸國珍拘大用不遣以小舸二百突海門入州港犯馬鞍諸山時國珍黨陳仲達往來計議陳其可降狀台哈布哈率部眾張受降旗乘潮而前船觸沙不能行與國珍

遇呼仲達中前議仲達目動氣索台哈布哈覺其心異手斬之即前搏賊船射死五人賊躍入船復斫死二人賊舉槳來刺輒斫折之賊羣至欲抱持過國珍船台哈布哈瞋目叱之脫起奪賊刀又殺二人賊攢槳刺之中頸死猶植立不仆投其屍海中僮名抱琴及臨海尉李輔德千戶持嘉義士張君璧皆死之追贈江浙行省平章政事封魏國公諡忠介立廟台州賜額崇節

吳揚

台州府志字仲修仙居人少負大志好騎射至正間郡監廬其才擢署黃巖州判會睦溪盜犯

仙居遂陞州同知率部兵逆戰於羅漢潭挫其鋒有鄉民陰為賊導賊掩其後揚格鬪大創而死長子煜襲職與弟燾斫等涕泣誓師趨搗賊巢獲其渠魁并向導者剖肝以祭之朝嘉其父子忠孝廟祀揚并官燾斫

應允中

台州府志字德聞方國珍反允中與宋備潘義和等募壯勇萬餘人戰於半野橋墮水遇

害贈臨

海尉

陳宣

太平縣志字欽召至正間方國珍寇海上郭仁本與之通宣令鄉民禦之仁本焚其廬宣自剄

張維賢

仙居縣志字允德維大弟虬髯猿臂至正間薦授南漳監鎮累勲擢武德將軍晉爵侯食

邑萬戶與明兵戰於蘭谿失利被獲初劉基與之善至是劉如械所說之降維賢曰吾非不知若主長者顧吾弟兄並開府受國恩不忍背也洎就刑劉與太祖曰主上掃平六合不宜使天下有殺義士名太祖領之謫戍武林不食七日死

明

葉伯巨

方孝孺葉伯巨傳字居升寧海人入太學未久詔諸生分教河北弟子伯巨得平遙縣洪

武九年星變下詔求言伯巨為書言三事曰分封太侈求治太急用刑太煩其語皆切直上大怒曰

小子何敢疎間吾骨肉速取以來吾將啖其肉伯巨至丞相乘上喜乃敢奏詔繫刑曹問狀死獄中

葉良器

台州府志寧海人慷慨有大節元末擾攘能保障鄉里歲己亥總制官胡深薦為千戶勦

山寇及征方國珍克平陽城陞萬戶深入敵境被獲不屈遇害詔存卹其家

方孝孺

朝野彙編字希直一字希古寧海人年十四事父克孝從宋漁遊盡得其所學以明王道

關異端為己任洪武十五年以吳沈薦召見上喜謂太子曰此端士也當老其才輔汝遣還鄉二十

五年召至擢漢中府學教授蜀獻王聞其賢聘為世子師名其讀書之廬曰正學太孫即位召為翰

林博士進侍講學士備顧問改文學博士北兵起
日召謀議詔檄皆出孝孺手北兵既渡江畫策堅
守誓死社稷建文遜去孝孺哀服晝夜慟哭姚廣
孝謂成祖曰陛下至京幸全方孝孺若殺此人則
天下讀書種子絕矣乃使廖鏞兄弟召之孝孺不
肯屈令鎮撫伍雲收孝孺繫獄猶遣人諭之再三
不從因使孝孺草詔乃召見孝孺號慟聲徹殿陛
上降榻勞曰先生何自苦余欲法周公輔成王耳
孝孺曰成王何在上曰渠自焚死孝孺曰何不立
成王子上曰國賴長君曰何不立成王之弟上曰
朕家事先生何自苦遂授筆札曰詔天下非先生
草不可孝孺投筆於地曰死即死詔不可草上曰
汝不顧九族乎孝孺奮然曰即殺十族亦無如何
且罵且哭上大怒令以刀抉其口兩旁至耳磔之
聚寶門外罵聲不絕時年四十六詔收其妻鄭
已先繼籍九族皆誅上怒不已必欲誅十族乃以

門人廖鏞等為一族誅之凡坐死者八百四十七人
人謫戍死者復數百人典史魏澤為匿其幼子洪
熙初仁宗嘗諭羣臣曰若孝孺輩皆忠臣也詔從
寬典方氏遺族始有赦還者因立祠堂祀之成化
初遺文
始出

王叔英

名山藏字原采黃巖人洪武初與楊太中葉
見太方孝孺林右並徵辭還久之薦授仙居

訓導陞漢陽知縣建文初召拜翰林編修言太祖
除奸剔穢抑強鋤梗若醫去疾若農去草急於去
病或傷體膚嚴於去草或傷禾稼疾去宜變其血
氣草去宜培其根苗又論行限田以數千百言靖
難師渡江叔英募兵廣德聞都城破仰天慟哭夜
留題几上沐浴衣冠書絕命詞衣裾間自經元妙
觀銀杏樹下妻金死獄二女死井中弟元默變姓
名匿市賞為鄉人金寬所識告成祖捕斬之剗其

屍

鄭華

獻徵錄字思孝臨海人洪武丁丑進士授行人奉使川廣有聲譽建文中註誤謫東平州吏目

靖難兵起謂其妻蕭曰吾義必死奈親老汝少何妻泣對曰君能為國妾獨不能為君乎華乃稱疾尋醫攜家托其友無錫丞趙次進馳還東平時州長貳盡棄城走華獨率吏民死守水漿不入口者三四日北將朱能攻陷東阿分兵取東平華曰守土之臣義不苟生請援不至力疾戰不屈死之時

年甫三十
祀八忠祠

鄭恕

備遺錄字本忠仙居人由訓導陞蕭縣知縣靖難師至竭力拒守被擒而死二女當配亦死之

子漁混
亦從坐

盧原質

續文獻通考字希魯寧海人母方孝孺姑也任太常少卿事建文君屢有建白靖難後召

見不屈死之弟原樸亦論死族其家

林嘉猷

嘉靖浙江通志名昇以字行寧海人始師事同邑王琦琦坐累徙雲南姻族無一人顧恤

者嘉猷徒步千里追送涕泣與別人高其義後復行六千里至漢中求方孝孺而師焉方氏之門嗜學之士至者無虛席而孝孺獨以得嘉猷及鄭叔貞為善最之使進乎聖賢之道曰匡我者二子也洪武二十九年以儒士校文四川蜀王謂其名字不相蒙乃更其名曰良顯由薦辟為史官累遷至陝西按察司僉事嘗被燕邸召入居處最久得隱以告孝孺內難平坐孝孺黨逮至京死之

鄭公智

吾學編字叔貞寧海人力學嗜古工文辭方孝孺薦之蜀獻王王與語經史公智數稱述

河間東平賢行王說之建文初侍孝孺至京尋舉賢良為監察御史持法不阿靖難後坐方黨論死

葉惠仲

吾學編名見恭以字行臨海人與兄見太並有文名稱二葉初任廣武衛知事陞知縣建

文初充史官修高廟實錄二年同考禮部陞知府永樂元年坐修實錄時書靖難事為逆黨論死籍

其家

盧迴

朝野彙編仙居人建文三年為戶部侍郎少喜飲酒酒酣輒長歌人或謂狂既仕折節恭慎靖

難後不屈就刑長謳而死

張崧

台州府志字原望洪武乙丑進士任監察御史丁父憂廬墓家居聞建文祚移自溺雙溪鬪

巖潭而死兄弟五人皆坐方氏黨編發邊衛

徐庠

蘇州府通判宗實黃巖人洪武初薦除銅陵簿擢

壞庠相度原隰大興築捍之役屬邑有樓貞婦奏乞旌表禮部謂前朝事不允庠言比干之墓誰封禮官不能奪從之歷官兵部侍郎靖難師起奉命招集兩浙義勇會建文遜位被逮至京不屈死籍

其家

石允常

獻徵錄字恆德寧海人洪武甲戌進士歷官河南按察司僉事廉介有聲人稱石清潭靖

難師起允常棄官歸文皇即位逮至繫獄謫戍中屯衛

林右

世法錄字公輔臨海人洪武初為中書舍人奉璽書行邊有功進春坊大學士命輔導皇太孫

以事謫中都教授尋挂冠歸靖難師入聞方孝孺族誅為位以哭永樂戊子賊誣海上台被其毒監

司聞右才請為閭里計右勉起視兵督郡子弟勸
平之上以此知右遣使召之不赴令武士械至京
師猶以溫語相慰勞右對曰罪人逃死已久藉
令可任當與方孝孺同朝矣上怒命劓之竟死

朱思平

天台縣志字廷準洪武丁丑進士除中書舍
人建文朝命為翰林院侍書親老乞歸靖難

時在籍聞變長號涕
泣作哀詞飲藥而卒

高昕

台州府志字彥容以掾考需次銓曹忤權官謫
戍大同時英宗北狩總兵定襄侯郭登聞其行

能使進衣行在且覘敵情比還大同被寇登問計
所以彼懸騎深入利在速戰但堅壁勿與交鋒彼
食盡將自遁選輕騎躡其後則敵不足破也已而
果遁追至沙窩敗之獲人馬無算陞鴻臚寺序班
寇突至復力戰
却之中流矢卒

齊汪

天台縣志字源澄正統丙辰進士累官車駕司郎中土木之變文武官軍踰山而逃或勸汪亟

回汪曰吾聞扈駕而出未聞先駕而入也竟死其難

鄔中涵

寧海縣志字世元兩登副榜嘉靖壬子貢於京授福清訓導倭寇福清邑故無城令是邑

者以單弱莫守委之而去中涵曰一命之臣皆有封疆之責況我官訓導當以忠孝為訓而顧可自叛名教乎爰鼓士氣集鄉勇樹高柵身冒矢石與賊對壘待援及督撫兵至而中涵已中飛矢死矣

聞於朝加贈卹命祀於學宮

張約

台州府志字存博仙居人邑諸生嘉靖丙辰倭寇犯境率家人禦於光山之麓為賊所執脇導

入城不從賊刳其舌猶噴血罵不絕口

劉國賓

閩書以台州衛指揮任烽火把總萬歷元年海寇林鳳數十船突入港國賓檄總刻期

同勦至斤竹洋與賊遇協總後期不至入勸之避曰死吾分也轉戰至寨前發銃反風焚舟戰士俱

殲國賓死之巡按

劉良弼題請卹錄

陳函輝

台州府志字木叔臨海人母應氏誕時夢寒山子至家因號小寒山崇禎甲戌進士授靖

江令開月河八十八里直達維揚水利以興庚辰奉旨視師海上渠魁就擒擢兵科給事為忌者所

抑罷官居里甲申聞變從郡大夫為位以哭慟不能起徑上雲峯自擇六月庚寅日死時尚隔旬餘

自序小寒山子年譜作自祭文雲峯埋骨記絕命詩十章及別親友詩數百函屆期自經死遂葬於

雲峯寺前著有七寒九青諸集行世

應昌士

舊浙江通志字君寧仙居人崇禎庚辰以特恩賜進士授安定知縣癸未闖賊圍安定昌

士倡兵民登陴死守越月城陷被執賊欲降之昌士奮罵不屈妻周氏與女真在旁亦奮罵賊先殺以脇之昌士笑曰各得死所矣終不屈械至蘭州偽帥親釋其縛從容勸曰識時勢者呼俊傑昌士舉杯擊偽帥首即席遇害僕趙登裏屍還安定與周氏合葬於東山

國朝

許鴻儒

舊浙江通志太平人字象垣順治四年歲貢選柳州羅城縣知縣到任日桂林失守羅城

孤立無援被執不屈死弟男五人俱遇害勅贈廣西按察司僉事遣使祭葬廕一子入監

余煜

鄉賢留祀冊臨海人康熙甲寅耿逆遣曾養性犯界時寧海將軍統師勸之募敢言之士先往

招撫煜毅然應召授知州
職銜絕城說賊遂遇害

婁汝初

旌忠冊黃巖人任寧波城守營千總康熙三十
十六年十一月二十五日捕賊於慈谿之陽

覺殿力戰而死營卒梁國棟陳勝朱建侯任吉胡
虎臣同被害事

聞廕

一子以
守備用

許文爵

旌忠冊浙江人任黃巖鎮標右營把總康熙
五十年十一月出洋巡防二十五日海賊蕭

利王突至弔幫文爵及營卒張萬鄭瑞等並力戰
陣亡事

聞廕

一子衛千總張萬等
卹賞銀各五十兩

金華府

宋

梅溶

浦陽人物記其先吳興人五代時有諱聳者始遷浦陽遂成巨族以薦為單州助教年七十餘

攝松陽丞宣和二年盜發青溪據歙睦遂破杭明年發衢處相繼陷兵及境溶勢不能敵死之從子

執禮言於朝官其二子敦時敦成

胡埜

金華先民傳金華人事親以孝聞崇寧間應八行舉除婺州教授宣和二年方臘反青溪據歙

睦明年兵及婺境官吏皆聞風棄城遁諸生勸埜避難埜曰我先世以武功顯而我應八行舉豈可

上負朝廷下辱先世耶城陷闔室皆死之事聞贈朝奉郎官其二子

申屠大防

金華先民傳東陽人勇果有武藝妙戰法往往為偽遁誘人追之背手取賊其捷如

神宣和初睦寇起官吏逃走民竄山谷大防毅然以身禦寇勦除魔賊仙姑邑人賴之時有薛太尉者奉命討賊檄大防權東陽縣事約往永康收方巖賊既行而薛後期大防無援力戰死錄其三子

邇遜迪
承信郎

項德

宋史鞠嗣復傳德武義人郡之禁卒也宣和間盜發幫源陷婺而邑隨沒德率敗亡百人破賊

因據邑之城隍祠東抗江蔡西拒董奉北捍王國大小百餘戰出則居選鋒之先入則殿後俘馘不可勝計賊目為項鷄子聞其鉦則相率遁去方謀復永康諸縣而官兵至德引其眾欲合會賊盡銳邀之黃姑嶺下德戰死邑人哭聲震山谷圖其像歲時祭之

許瓊

金華先民傳字子英東陽人睦寇竊發瓊集鄉兵捍之民賴以安奉檄援郡城有功補奉義郎

攝郡事既而兵食不繼與寇力戰死之屍殪立
如生所乘馬馳歸鄉人為立廟祀於巖關之陽

梅執禮

宋史本傳字和勝浦江人第進士以薦為武
學博士歷知滁州集英殿修撰時賦鹽虧額

滁亦苦抑配執禮請於朝詔損二十萬欽宗立徙
知鎮江召為翰林學士道除吏部尚書改戶部金
人圍京都執禮勸帝親征用事者沮之洎失守金
人質天子邀金帛以數百萬計執禮與同列陳
知質程振等室其求曰臣民皆願致死於金繒何
有哉顧比屋枵空無以塞命耳帥怒俄遣還將及
門呼下馬撾殺之而梟其首是日天宇晝冥士庶
皆隕涕初車駕再出執禮與宗室子昉諸將吳革
等謀集兵萬勝門夜搗金帥帳迎二帝以歸而范
瓊泄其謀故不克死時年四十九高宗即位詔贈

通奉大夫資
政殿學士

欽定四庫全書

浙江通志

十四

陳德固

兩浙名賢錄金華人靖康初為京城守禦司屬官嘗獻守禦之策朝議沮之及京城失守

督士卒與敵力戰而死子巖肖以任子中紹興戊午詞科

劉滂

宋濂劉滂傳字德霖武義人與梅執禮同遊學號東梅西劉大觀己丑進士調新昌令豪鄉氏

橫里中挾貴嫚誣人死滂捕致械治之部使為請不聽卒傳以法蔡京與滂祖為布衣交滂至京師京欲挽為黨滂拂衣去建炎中知建昌軍建昌兵習悍驕邀求無度滂至一以法繩之兵不勝忿持戟入市掠人物即拒者刺傷之滂捕繫追償兵遂為變滂及母妻皆死其妻湯氏侍姑側兵及身猶不去故遇害建昌人聞滂死皆慟哭失聲朝廷既誅始亂者褒滂為朝請大夫官其一子壙

應純之

金華先民傳字純甫永康人嘉泰三年進士歷知楚州兼京東經畧安撫使收捕李全等

所向多捷會李全來歸密請於朝謂中原指日可復史彌遠鑒開禧事不欲大舉但救立忠義軍令純之節制既而陞兵部侍郎與金戰沒於陣朝廷嘉其忠遣使葬之

呂祖泰

宋史本傳字泰然夷簡五世孫慶元初兄祖儉以言事安置韶州祖泰徒步往省之且曰

自吾兄之貶諸人箝口我雖無位義必以言報國當少須之今未敢以累吾兄也及祖儉歿貶所嘉泰元年周必大降少保致仕祖泰憤之乃詣登聞鼓院上書論侂冑有無君之心請誅之以防禍亂書出中外大駭拘管連州右諫議大夫程松奏言祖泰有當誅之罪縱不殺猶當杖黥竄遠方侍御史陳謙亦以為言乃杖之百配欽州牢城收管祖泰知必死冀以身悟朝廷無懼色既至府廷尹為好語誘之曰誰教汝祖泰笑曰公何問之愚也吾固知必死而可受教於人且與人議乎尹曰汝病

瘋喪心耶祖泰曰以吾觀之若今之附韓氏得美
官者乃病瘋喪心耳侂冑誅詔雪其冤特補上州
文學改授迪功郎監海嶽廟喪母無以葬得寒疾
索紙書曰吾與兄共攻權臣今權臣誅吾死不憾
獨吾生還無以報國且未能葬吾母為
可恨耳乃卒尹王桄為具棺斂歸葬焉

李誠之

宋史本傳字茂欽東陽人受業呂祖謙鄉舉
第一後入太學舍選亦第一慶元初為饒州
教授擢國子學錄以言罷起為江西轉運司幹辦
使改通判常州知郢州知金人必敗盟大修邊防
戰攻守禦之具移知蘄州斬自南渡以來未嘗被
兵誠之相視城壁而增益之嘉定十四年金人犯
淮南時誠之已逾滿代者不至欲先遣其孥歸聞
難作而止乃選丁壯分守募死士迎擊大破之殺
其帥金人屢挫謀益巧攻益力未幾又殺其將卒
數十人奪所佩印金人卒不得志會黃州失守併

兵為一凡十餘萬池陽合肥援兵敗走誠之激厲
將士勉以忠義城陷率兵巷戰殺傷過當子士允
力戰死誠之引刀自剄妻許及婦若孫皆赴水死
事聞贈朝散大夫祕閣修撰封正節侯立廟於蘄
贈其妻令人士允通直郎子婦
及孫女之沒於難者皆贈安人

童必大

義烏縣志字本厚嘉定丁丑進士授竹山令
歷安定知府寇發率民兵捕勦次年寇復圍

城嘆曰生死有定忠孝豈能兩
全統兵赴敵遇害諭葬銅山

樓斌

續浦陽人物記字一中浦江人私淑倪文卿氏
讀其疏草知兵食戰守之策山川險要之處冀

旦暮得當以佐恢復每聞難起舞曰中原陸沈豈
丈夫安枕時乎聞史彌遠矯詔殺濟王作詩哭之
詩漸傳播逢彌遠意者逮治斌斌不為屈會有解
之者得釋登淳祐十年進士累官至翰林說書開

慶元年賈似道鄂州乞和以捷聞斌直發其奸章三上似道怒噉言官劾其誣罔受責傷重賦詩而逝

劉仕龍

馮夢得劉仕龍墓誌字時甫世家於婺淳祐辛丑進士從戎鄂州秩滿幹辦江陵府御前

諸將軍統制公事台試閣職除閤門舍人請外知復州尋守宿谿關隘飭鬪器未幾易守廉備廉如在賓時數條上邊事時宰忌之徑坐是去景定改元詔知雷州兼理軍務會敵犯疆統領諸將出禦中流矢以歿封武節侯

許伯繼

金華先民傳字為可東陽人父子良仕至台州守伯繼以廕入官咸淳末差婺州通判時

李珣開府處州辟伯繼主管機宜文字未幾移閫永嘉元兵入臨安三宮北遷宰相陳宜中以衛益

二王如永嘉元兵追及之力戰數日城破珏降伯繼就縛不屈死之

章瑱

金華先民傳永康人咸淳末都城失守浙東諸郡多陷時衛益二王在福州瑱與弟堅捐家資

募忠勇得義兵數千收復婺城制置使李珏以聞授瑱直祕閣知婺州堅主管官誥院通判衢州與元兵力戰於丁鼠山援絕城陷瑱與堅皆死之

胡德廣

東陽縣志字及之景定庚申元兵渡江奸人因之為盜德廣鳩聚鄉兵撫安邑境郡縣上

其功特授迪功郎尉仙居縣以親喪不赴德祐初元兵入臨安宋丞相奉三宮赴燕德廣曰吾以身許國義當與國存亡遂集義勇日夜訓練之未幾婺州破乃嬰城自守會永康章瑱起兵復郡遣人邀德廣德廣曰吾去則奸謀復起亂在肘腋遂不往未幾瑱敗元兵乘勝至東陽德廣據險拒之元

兵屢挫前謀逆者附於元以間道示之攻其後衆遂潰德廣不屈死其配朱氏亦自刎死

唐元章

兩浙名賢錄一名太初字子煥蘭谿人詔之弟也為文思院官德祐失國二王南遷元章

與兄詔子良嗣起義興復時元兵壓蘭谿元章與戰於黃溫灘破之斬其將奚達魯元兵退保桐廬遂進兵拒守嚴州朝廷以元章為朝請大夫知嚴州良嗣加閣門宣贊武翼將軍江淮閩浙都統兵馬使相持二年糧援不繼戰不利將趨閩以圖再舉元兵大至元章戰死於龍游白雲寺前元主帥索多以雙虎符金牌招良嗣不從亦戰死於仙霞嶺

徐道隆

宋史趙良淳傳道隆字伯謙武義人以任入官累官潭州判官權知全州荆湖制置使汪

立信奏辟為參議立信遣兵部尚書趙孟傳為制置使以道隆為提點刑獄時文天祥既至平江潰

卒四出為浙西患安吉尤甚有旨命道隆措置乃
集其首亂者於市牛監軍遁范文虎程鵬飛管景
模俱遺書誘降道隆焚書斬使元兵至郡守趙良
淳既縊死德祐二年正旦追兵及道隆死戰矢盡
槍槩折一軍盡沒道隆見執艦
內赴水死長子戴孫亦赴水死

吳世鳴

舊浙江通志蘭谿人歷官提幹終錢塘縣令
時元巴延駐軍江沙世鳴挺身出戰死之

柳敘

浦江人物補遺字元德貫從父也
為蘭谿縣尉宋亡慟哭絕食而卒

元

胡嘉祐

金華先民傳字元祚永康人至正乙未縉雲
弱溪賊剽掠逼境嘉祐白邑令為防禦計乃

散家財集丁壯立保伍大書其幟為義兵賊不敢
犯詐降尋復旁出抄擄會官兵至嘉祐率其兵助

討之賊退兵駐邑中頗恣睢嘉祐扣軍門白主帥樹旗於鄉約曰敢擾吾民者殺無赦士卒皆如約鄉民安堵令嘉其能上其名於憲府署曰義士俾與方允中合而拒賊賊不敢越鯉溪而西歲丁酉賊寇武平合德嘉祐與戰大破之戰於前倉又破之遇於占田嘉祐盡銳與戰顧謂允中曰賊衆我寡惟死鬪耳自辰至午戰酣不解允中歿於陣嘉祐自分不獨生戰益力厲聲罵賊死之

唐元嘉

金華先民傳字顯德蘭溪人進士釋褐授仁和县丞陞浙江行省掾至正末從丞相達爾罕節制金陵兵敗被執不屈死之

劉良

兩浙名賢錄金華人辰之從父也仕元為常州萬戶府知事張士誠圍常州援兵不至良遣其

子毅齋蠟書浮江間道抵江浙行省求救未及還而城陷良不屈闔門赴水死者十餘人

趙大訥

金華先民傳一名良勝字叔敬浦江人起家譯曹掾調泉州錄事盜起寧都泉之無賴嘯

聚應之遂來攻城大訥作大柵以遏其衝寇退轉興化錄事遷龍溪尹俗尚鬼壘石作祠奉紫衣神黥民將為奸大訥棄神江中移石修孔子廟縣多山畚峒獠輒弄兵暴掠大訥調御得術服從如良民調温州永嘉尹遷知永新州鵠湖羅陂皆羣盜淵藪大訥出奇計翦渠魁餘黨奔散請老加婺州路總管府同知致仕戊戌明兵破睦州至浦江或誘之降大訥曰吾元朝老臣惟有一死報國耳或強之行曰吾不能行使之乖曰吾不能乘刃之不能病創死

陳達

兩浙名賢錄字元達蘭谿人自中之孫也父萍仕元為宣政院使達自少徵入宿衛學書於康

里子山詔書欽安殿榜稱旨擢端本堂司經正字文學官立朝蹇諤嘗劾圖魯特穆爾忤旨賴太子

營救得不死辭官歸永嘉從進士陳高受尚書語
及時事輒於邑流涕復召為翰林學士不起明師
下温州自沈於淵軍士引出之持佩刀自裁軍士
奪之乃斷髮示無用安置濠州遇赦還蘭谿病風
痺聞有薦於朝
者却藥弗御卒

明

鄭得

續浦陽人物記浦江人龍鳳七年胡大海為江
浙行省中書開府金華有薦得才者署為稅課

使并參軍事用其言約束卒伍加意市廛四方商
賈湊集錢幣倍增次年苗兵蔣英等作亂殺大海
守宰咸遁去得急取印券置他處亂兵索印斷其
左手得詈曰首可斷印不可得李右丞在睦爾輩
直釜中魚耳賊懼釋之越二日
李文忠赴難賊遁得以重傷卒

王禕

名山藏字子充義烏人善文辭與宋濂並受學於元學士黃潛與濂齊名李文忠守金華用禕

為儒士召署中書省掾上常字之授江西儒學提舉司校理除侍禮郎兼引進使遷起居注轉同知南康府事上將即位召議禮忤旨降漳州府通判天下既定租稅未盡減除禕至郡具以均徭薄賦言於上上嘉納之召還與宋濂同修元史書成授翰林待制同知制誥洪武五年使雲南諭降巴咱爾幹爾密封以梁王禕至雲南延禕為上客會元有後裔自立於漠北使托克托至巴咱爾幹爾密所求赴兵巴咱爾幹爾密背之匿禕於春登楊氏家意候其去且議從禕降托克托知之遽問使安在巴咱爾幹爾密謝無有托克托動色曰大王與舊君骨肉之親唇齒之勢也當死相守而誓相關今國亡不救內靡義旗旋踵外嚮何面目耶即上馬去巴咱爾幹爾密畏托克托乃出禕見之托克托怒欲屈禕禕罵曰爾

嗣君涼德作怨民散盜起皇帝神明威武海內歸
心登大寶於布衣取天下於羣盜爾孽不自忖量
尚欲焰燭火燃死灰三尺童豎知其無能為也托
克托怒遂殺之建文時禕子紳言於朝贈翰林學
士奉議大夫謚文節成化六年又謚忠文紳子徐
以孝稱方孝孺被刑徐與鄭珣私負其骨成祖逮
徐繫獄既以禕故宥之予之官辭以疾
入青霞山卒門人私謚為孝莊先生

王名善

邵遠平牟魯傳名善義烏人為高州通判洪
武時海寇何均善被戮其黨羅子仁率眾潛

入城執名
善不屈死

龔泰

備遺錄字叔安義烏人九歲而孤母傅氏躬教
之洪武丙子領鄉薦入太學授戶科給事中遷

都給事壬午靖難師駐金川門與妻傅訣曰事至
此吾分死矣爾齋戒攜幼穉以歸否則俱溺於井

辱可免言未竟火起內廷泰馳赴之道為兵校所執見上以非奸籍釋之泰既得釋遂從城上撲下死而

樓璉

吾學編字士連金華人嘗從宋濂學洪武中以儒士召歷藍田知縣擢廣東道監察御史謫戍雲南建文嗣位屢下詔求賢璉以文學舉入翰林侍經筵官至侍讀靖難兵入京文皇命方孝孺草詔孝孺不可改命璉惶懼不敢辭歸而憤悶自經死

楊榮

湯溪縣志湯溪人敦尚風節以詩文名洪武間領歲薦任國子助教靖難兵入京棄官歸永樂改元有詔錄用舊臣榮與焉辭不赴強至中途嘆曰吾何顏復掛名仕籍乎遂赴水死

李任

嘉靖浙江通志永康人洪武中襲父爵為燕山右衛指揮永樂初陞遼東都司宣德元年從征

交趾叛賊黎利守昌江城與顧福等率精銳出擊賊燒其攻具賊又築壘射城中任福夜出襲破賊營賊掘地洞欲潛入城任開橫溝用石擊之入者輒死城中士卒初有二十餘人前後三十餘戰死亡過半賊益兵攻圍日急相拒凡九閱月人力疲困芻糧匱乏賊以雲梯登城奪其門任復率死士三戰三敗之後賊擁兵入任與福不能支乃自刎死

樓澤

萬歷金華府志字濟霖正統乙丑進士授刑部主事十四年扈駕北征師潰於土木死之

包良佐

湯斌包良佐傳字克忠蘭谿人正統壬戌進士授吏科給事中上言吏治考課未嚴宜選

清望大臣巡察又言福建官司貪黷致盜宜正刑章悉從之從駕土木遇難死

陸震

獻徵錄字汝亨號鶴山蘭谿人正德戊辰進士授泰和縣知縣至即訪求民情吏弊及賦役輕

重風俗美惡而一新其政時逆瑾擅政以逋齟誣民邑中船戶應償銀兩以萬計千連數百人震極力辦白盡釋之鎮守中貴歲取貢絳亦為告免得減其數民賴以甦秩滿授兵部主事陞員外郎武宗南巡震與武選郎中黃伯固合疏言崇聖學通言路正名號戒遊幸去小人建儲貳疏入詔下錦衣獄三加訊杖及出獄以創重卒臨革索筆作書與諸子曰吾雖死汝等當勉為忠孝庶不負吾教也

周煥

續浦陽人物記博學能文居家孝友嘉靖戊午由貢士尹福建永福任甫兩月倭寇攻陷城邑

煥率民兵督戰斬獲百餘級賊憤併眾來攻煥堅守月餘力竭食盡外援不至披甲巷戰而死家人死者八人福民立祠祀之

王鈇

萬歷金華府志東陽人嘉靖庚戌進士授常熟令時倭寇充斥鈇豫繕城垣待之寇至境輕舟往覘適與寇值衆皆潰散遂遇害贈太僕少卿立祠祀焉廕子錦衣衛百戶

童子明

義烏縣志字南川必大裔也嘉靖辛酉倭犯台台巡道趙大河募勇士子明應募遇倭斬

馘無算壬戌海寇犯閩沿海興化諸郡縣皆陷檄子明從戚繼光由台抵閩殲其渠搗其穴時山賊與海寇相表裏仙游諸暨尚為所據子明以繼光符返義烏集義勇前驅撲賊至仙游賊四伏競起子明力戰歿於虎嘯潭嗣子文麟廕授金華守禦所世襲百戶

張三鳳

浦陽人物補遺東陽人從軍以功陞溫州衛指揮使調往朝鮮征倭署為先鋒斬首數十

級生俘十餘人乘勝單騎先驅遇伏被擒不屈死之世襲杭州衛百戶

龔子敬

萬歷義烏縣志由武科以功授金華千戶萬

曆二十年陞授陝西甘肅遊擊統兵長驅敵

聞風驚遁既又勦賊劉東陽等星夜兼程追至沙

湃口殺十餘人賊奔乘勝追之經數百餘戰陣亡

贈都督僉事廕一子

惟棟金華所正千戶

金啓侗

崇禎義烏縣志援例丞德平以薦授永平

督寧遠餉事天啓六年寧遠攻圍甚急啓

參議廕其子玉勝錦衣衛正千戶

周鳳岐

舊浙江通志字宇和永康人萬歷己未進士

授中書轉戶部郎中魏忠賢索靴料銀兩厲

色拒之放歸崇禎元年起為禮部郎中陞湖廣江

防道轉四川兵備蜀苗爭疆為立碑定界以解之

陞澧州參政流寇圍荊州當事檄鳳岐應援賊將

王老虎襲澧州鳳岐轉戰恢復未幾張獻忠陷長

沙轉攻澧州參議陳瑄出戰全軍覆沒城陷鳳岐被執賊親解其縛諷之降鳳岐怒罵曰予愧不能為君父報仇誓不與賊同生張奉擊之賊遂斷其臂剖腹而死贈都察院右副都御史賜祭葬廕一

子

徐學顏

續獻徵錄字君復永康人性孝友父司城中危禍不得直學顏以臂血濺司寇庭甦其獄

崇禎乙卯以貢生拜楚府長史危襟正色王敬憚之凡豪宗不若於訓者理格勢禁弗少阻比攝江夏縣符適寇氛震驚乃築砲臺資捍禦刁斗森嚴世謂有老种小范風士午補兵備癸未武昌陷學顏與賊格鬪斷左臂尚持刀罵賊遂被支解閭門殉難者二十餘人贈按察司僉事專祠於鄉廕一

子

施廷賢

浦江縣志字元英崇禎丙子副榜授蘄州黃梅縣丞值流寇侵擾廷賢署邑築增雉堞備

軍器庚辰寇泊城見戒嚴引去陞知縣會張獻忠破荆襄數郡圍黃梅月餘不下陽釋去夜偷襲城城陷巷戰被執賊敬禮之廷賢厲聲曰國有民城不能守家有母養不克終上愧君親下負所學從容再拜奪佩刀自刎

方應時

浦江縣志字朝中由掾曹授江津主簿署縣事張獻忠攻城十月不下後令至城陷應時

之死

王肇坤

金華府志字亦資蘭谿人崇禎辛未進士祖繼泉聞報手書九字箴寄之曰忠事君慈視

民清律身肇坤奉訓惟謹授刑部主事清理滯獄以平恕稱擢江西道御史上疏請太子出閣講學

巡視兩關簡閱兵馬士卒肅然時羽書告急所在震動或謂閭臣無守土責肇坤厲聲曰同為臣子敢分職守耶即日介馬馳赴時營兵調出無足供干櫓者肇坤以忠義激勸士民咸感奮緣賊衆勢不能支身中四矢兩刃而卒事聞賜祭葬贈大理寺卿封祖父廕一子

鄭國祥

金華縣志金華人授守備崇禎間東陽許都反出城禦之被害

洪希樾

湯溪縣志字子修由歲貢授松陽訓導陞江西德安教諭流賊王瘦子之亂部撫命以教

官帶兵守城同僚或有難色希樾曰食人祿者忠其事雖職卑官小而忠君之心則一也領兵守小城陷被害

傅巖

舊浙江通志守野倩義烏人少孤貧及長好讀書作詩賦古文辭皆鐫理刻肌風瀾特妙天啓

甲子舉南雍登崇禎甲戌進士知歙縣舉循良第一後以讒去官明亡死於金華子齡發齡熙同死之

黃一鷗

永康縣志入太學任濟寧州同陞東昌通判流賊圍城一鷗分守擊賊城陷被執罵不絕

口遂遇害閭門三十餘口皆殉難妾沈氏匿水溝中賊退始出遍尋死骸認素所繫錦囊得屍葬之

傅啓耀

義烏縣志字秀巖熹廟時守備山海轉天津鎮海援鮮都司尋以遊擊從征廣東改鎮虔

吉收復江西流寇陞參將癸未移京口明年晉都督同知明亡全家沒於閩

朱大典

舊浙江通志字廷之金華人萬厯丙辰進士授山東章邱知縣陞兵科給事中厯福建參

議回籍崇禎四年起山東參政巡撫山東晉少司馬八年流賊陷鳳陽焚陵寢命大典總督漕運兼

巡撫破賊於壽州十二月賊攻滁州大典同盧象昇合十道兵馳援賊敗走九年賊犯陵寢大典授計總兵楊御蕃追擊賊宵遁渡河十年賊老回回等分十路焚掠江北大典會諸路軍破走之後罷歸明亡合門自焚死

張國維

舊浙江通志號玉笥東陽人天啓壬戌進士授番禺令清理沙漲田數萬畝以業貧民擢

刑科給事陞太常寺少卿巡撫江南以安慶孤懸江北請增兵戍守又相度繁昌太湖高淳蕪湖等處皆有興築各郡縣改折及虛糧白糧等項悉清夙弊崇禎八年築九里石塘平望內外塘九年築松江捍海等塘十年築長洲至和等塘濬江陰運河十一年又築鎮江漕渠皆報竣乃輯吳中水利全書晉工部右侍郎總督河道兼提調徐臨通津四鎮漕餉事務值天旱禱於泰山得大雨乃挖浚

上下泉源蓄水以濟糧運又先後擒斬逆賊李青山王朋徐見隆張文宇等東境以安晉兵部尚書
明亡投
水死

葉向榮

孫治葉向榮墓誌字鍾日金華人萬厯戊午舉人為寧陽令邑有新舊兩城皆頽圯向榮

嚮家產倡民助築不數月而崇墉改觀武庫軍器多朽窳急為繕治堅利又募壯士分置各鄉教習稱精兵凡禦寇數次而邑賴以全癸未李闖壓境乃即向所募銅甲軍三百與練習鄉勇三千分布各關堡自為守護急則首尾相應賊聞其戒嚴而去明年賊黨於烏羊坑臺使者上言治行第一移吉安丞遂歸里明亡肅衣冠
北向再拜投項村之崖而死

杜學伸

東陽縣志字適我以武功厯任都督無事崇禎十三年陞孝陵參將內監張其蘊盜伐陵

木學仲發其奸上震怒盡撤天下鎮守內監公卿皆壯之然與宦寺水火遂引退明亡衣冠拜闕死

天寧

寺中

丁文明

義烏縣志字蒞甫由錦衣衛試武闈三科皆雋崇禎六年授直隸井陘道中軍守備同總

兵鄧玘合兵夜襲張獻忠獲全勝八年又破流寇王剛餘黨慙陞兗州參將叛寇李青山嶠峙山東文明大破之幕府上其功陞副總兵署都督僉事後兗城陷以身殉

王猷

義烏縣志字廷熙崇禎十三年以將材考授廣東香山守備調防韶州十五年張獻忠掠湖南

調往援恢復郴州宜章等處繼調協勦江西撫州建昌等郡土寇陞南韶參將明亡死節

國朝

周世榜

福建名宦冊義烏人順治三年任順昌縣典史土寇攻城佐縣令錢嘉倫晝夜捍禦却之

尋復來攻城陷不屈死

金漢蕙

金華府志字湘鄰順治己丑進士授廣西參議分守右江單騎之官馳驅榛莽中招集流

亡勸農課學藩撫交薦無何地方反側挈印趨會城者趾錯蕙獨親率士民守禦孤城援絕城陷脇降不屈遂遇害

吳尚鉉

金華府志字惟鼎浦江庠生有膽畧康熙十三年閩寇猖獗尚鉉率先捍禦與賊戰於松

村死之公舉事實尚鉉事母趙氏以孝聞順治三年浦江旱斗米八錢尚鉉出米五十斛賑濟康熙十年又旱出穀四百石煮糜以賑開義館於吳溪延師以教其鄉人宗族聞閩變團練鄉勇守禦與

賊戰遂
遇害

楊三虎

義烏縣志義烏人康熙三年授湖廣巡陽府遊擊八年陞陝西靈州參將以功陞秦州副

將十八年調征四川十九年攻成都得永寧鎮九月城陷殉難奉

旨諭祭贈左

都督

傅弘基

福建名宦冊金華人漳州城守遊擊分防長泰縣康熙十六年海寇圍城弘基嬰城固守

城陷被執不屈死事
聞卹廕一子

浙江通志卷一百六十五

欽定四庫全書

浙江通志卷一百六十六

人物二

忠臣四

衢州府

晉

徐弘

萬厯龍游縣志字聖通習韓詩春秋舉孝廉為汝陰令縣大姓多兼并弘至官誅鉏奸桀豪右

斂手商旅露宿道不拾遺童歌曰徐聖通政明公平刑罰奸宄空遭扶風守與賊戰死

唐

祝奢

正德江山縣志字伯宗隋末喪亂率子弟以保鄉里唐武德四年為賊李子通執於杭死之浙

將李太亮疏其忠馳令昇歸九年詔封妻陳氏為懷德縣君

宋

徐晉卿

天啓衢州府志字國梁開化人仁宗朝召對為義井記嘉其才救知洪州尤精於韜畧後

戰亡於廣南金城驛子睦神宗朝給事中知延州元豐五年帥師伐寇戰亡於新城事聞帝臨朝慟

哭贈柱國少保節度使

毛鼎

雨浙名賢錄字叔鎮江山人少有節操晚以特恩為歙七曹睦寇攻城官吏皆遁鼎曰吾職司

寇獄有繫囚誼不可去乃攝州事時二子貢辟雍
即遣人持印緹城以出令上之朝城陷巢衣冠坐
堂上賊脅使降不屈罵不絕口嬰刃而死妻錢氏
弗忍去婦掖其姑又弗忍去俱遇害事聞贈朝請
郎

江汝度

弘治衢州府志字致一開化人為桐廬尉會
方臘竊發死事特贈通直郎官其子蹊蹕

徐揆

宋史本傳衢州人遊京師入太學靖康元年試
開封府進士為舉首未及大比而遭國難欽宗

詣金營不歸揆率諸生扣南薰門以書請車駕還
闕金人見書使以馬載揆至軍詰難揆厲聲抗論

為所殺建炎二年追錄
元節贈宣教郎官其後

毛奎

天啓衢州府志舊名個字世高紹聖間進士為
閩曹建卒張員作亂奎力疾諭之遂死於兵血

流如
白乳

方允武

宋史朱蹕傳允武衢州人武學上舍補官為常州宜興巡檢建炎三年金人入縣金泉鄉

允武率土兵鄉夫迎戰殺獲數級奪弓箭與旗後遇金兵梅嶺村力戰而歿詔贈兩官官其子二人

徐徽言

宋史本傳字彥猷西安人大觀二年詔求材武士以徽言應詔賜武舉絕倫及第愿保德

軍監押以邊功累遷秉議郎靖康初遣武翼郎閣門宣贊舍人金人圍太原分兵絕饗道自隰石以

北命令不通者累月徽言以三十人破之遣武經郎知晉寧軍兼嵐石路遷安撫使金人再犯京師

陝西制置使范致虛檄徽言守河西欽宗割兩河以紓禍同知樞密院事聶昌出河東為金人所劫

以便宜割河西三州隸西夏晉寧軍民大恐徽言遂率兵復取三州時河東郡縣淪沒遺民日俟王

師徽言陰結汾晉土豪十萬約復故地則奏官為
守長聽世襲條其事以聞俟報可即身率精甲擣
太原徑取雁門留兵戍守金人忌徽言欲速拔晉
寧以除患建炎二年自蒲津涉河圍之先是徽言
移府州約折可求夾攻金人可求降金將婁宿挾
至城下以招徽言徽言故與可求為姻乃登陴以
大義噉數之可求仰曰君於我何太無情徽言攝
弓厲言曰爾於國家不有情我尚於爾何情寧惟
我無情此矢尤無情一發中之是時河東皆已陷
獨晉寧屹然孤墉橫當強敵徽言與金人數十戰
所俘殺過當金進攻數敗圍之益急晉寧俗不井
飲寄汲於河金人載芟石湮塞支流城中水乏絕
人人惴憂徽言能得衆心奮枵餓傷夷之餘哀折
槃斷刃以死固守既自度不支置妻子室中積薪
自焚仗劍坐堂上拔佩刀自擬左右號救持之急
金兵狎至挾徽言以去婁宿得徽言所親說徽言

徽言怒曰吾恨不屍汝輩歸見天子將以死報太祖太宗地下婁宿又出金制曰能小屈當使汝世帥延安舉陝地并有之徽言益怒罵曰吾荷國厚恩死正吾所膝詎為汝輩屈耶婁宿舉戟向之覲其懼伏徽言披袵迎刃意氣自若飲以酒持杯擲婁宿罵不已金人知不可屈遂射殺之事聞賜晉州觀察使謚忠壯子岡同死

事從孫適亦以守安豐死

周隨亨

正德江山縣志崇寧二年進士紹興間以直龍圖閣傳宣陝蜀死於閬州亂軍贈忠國侯

趙汝標

弘治衢州府志字津叔開化人少倜儻嘉定壬午為蘄州僉判敵圍城三日救兵不至與

守臣李誠之死之朝廷官其子二人

祝夢熊

正德江山縣志嘉泰進士尉黃巖寇警犯境率義勇抗之被執不屈而死

朱友恭

宋史朱昭傳友恭西安人金人犯陝西渭帥以下皆叛死者湮原第一副將朱友恭贈敕

武郎

何新之

嘉靖浙江通志西安人仕至樞密院編修嘗採唐宋詩為詩林萬進後知終安軍死節

徐應鑣

宋史高應松傳應鑣字巨翁江山人為太學生恭帝入燕三學生百餘人皆從應鑣與其

子琦崧女元娘誓共焚子女皆唯命太學故岳飛第有飛祠應鑣祀飛曰天不祐宋社稷為墟應鑣

死以報國琦亦賦詩自誓祭畢以酒肉餉諸僕諸僕醉卧應鑣率子女入梯雲樓縱火自焚一僕未

寐聞火聲穴牖視之父子儼然坐立如廟塑像走報諸僕諸僕壞壁入撲滅火應鑣不能死與其子

女怏怏出戶去莫知所之翌日得其屍祠前井中贈朝請郎秘閣修撰同舍生私謚曰正節先生

毛附鳳

正德江山縣志宋室北遷益廣二王入閩取道江山元兵急追附鳳以義兵遏之二王得

抵閩而附鳳

身嬰其難

魏亨中

弘治衢州府志開化人德祐丙子起義兵浮海以死

元

汪文燦

弘治衢州府志字良辰常山人十八鄉舉第二泰定甲子成進士授餘姚判官遷翰林編

修舊居里曰慶善郡守白亮更名尊賢里後仕至中議大夫嶺南廣西道肅政廉訪副使以國難憂

憤不食卒有歸朝

葉明農葉行世

蘇幼安

正德江山縣志字心德舉明經為衢州路教授歸老時鄉寇犯境欲執幼安去大罵不屈

而死賊遂解去
鄉人立祠祀焉

明

周廣中

正德江山縣志字子容官至河南僉事洪武庚申雷震謹身殿三上章不報遂致仕後以

直道死於權
奸聞者偉之

周能

正德江山縣志字德成其先江北人占籍江山幼驍勇習武藝明初從征番陽授百戶累立戰

功陞福建行都指揮
使後征雲南陣亡

柴德載

正德江山縣志為工部主事洪武初以剛直忤權相胡惟庸而死

王均

衢州府志字贊平開化人洪武間充錦衣衛校尉後轉寧府從征陣亡

韓永

名山藏西安人為兵科給事中論事慷慨靖難後杜門不出召之仕不應曰吾王蠲也遂坐死

金玉鉉

衢州府志名鼎以字行常山人洪武十五年鄉試中式授戶科給事中歷國子助教五經

博士永樂四年以直諫賜死兄輝同年鄉舉歷任泗州學正成祖謁孝陵輝以燕王禮見極刑死

余春壽

衢州府志字永齡開化人以薦舉知諸城縣能擊貪暴抗權右永樂時以劾宦者罹重禍

黃埒

衢州府志江山人嘉靖四十二年處州賊作亂埒率丁壯數十人禦於破塘塢口自辰至午與

黃鈺周梧俱死之鄉人為立祠

徐可求

舊浙江通志字世範西安人萬歷壬辰進士知上海民告人命多虛俟准詞後方於野外

尋屍以証可求命告者隨車相驗事誣坐之民乃服擢選部轉太常巡撫四川因臺省二使召土兵

激變盡節軍中詔贈右都御史
廕一子世襲指揮僉事

柴薦裡

河南通志江山人崇禎末以舉人知洧川縣流寇破城不屈大罵賊怒殺之

葉應武

衢州府志龍游人萬厯己未武進士授京營游擊歷官協守薊州副總兵崇禎二年以孤

軍沒於陣贈都督同知

徐應泰

西安縣志西安人崇禎初東撫募士勤王應泰杖策往從署都司銜大加委任會萍島兵

變據登萊郡命以偏師戍海口扼其歸路諸島師合兵攻之兵敗自鑿沈其舟死海中贈懷遠將軍

廕一子

祝錫範

龍游縣志字克舉以明經授襄陽別駕時流賊蹂躪中原荆襄鄖陽尤甚鄖撫盧象昇晉

督七省凡糗糧芻芻悉仰給焉會朝議遣使招撫象昇特舉錫範往賊初見時頗加禮後聞象昇改授宣大賊曰天下事可知矣我將入蜀君能從我富貴乎錫範遂自縊於錫莪山賊嘆息曰忠臣也懸標於屍上拔營去裏王送其柩歸葬焉

李正光

衢州府志字際熙龍游人崇禎時為北京虎賁左衛參軍甲申李自成入京師正光合門

死節

徐日舜

衢州府志字五臣西安人由卒伍為雲南參將城破猶披甲乘馬登陴力戰被擒不屈矢

貫舌端而死

陳其禮

衢州府志字以讓西安人崇禎己卯副榜授福建閩清縣有能聲城破為兵士所執不屈

死子龍王媳吳氏壻徐應宜
皆被害男女死者十五人

國朝

徐光旭

鄉賢留祀冊常山人崇禎壬午舉人任昌化教諭再補黃巖甲寅閩變逼以偽職抗節不

受逃匿永嘉山谷中不食而卒

徐光皓

鄉賢留祀冊常山人任山東新城令減火耗清徭役解組歸值耿逆之變被擄逼受偽劄

不屈罵賊而死

江之崑

衢州府志字玉鄰常山人康熙甲寅閩逆亂賊將吳安邦破常山欲降之之崑罵賊不屈

與次子世晟俱被害妻張氏媳曹氏孫女如娟俱殉

鄭大來

衢州府志開化人府學生勇力絕倫習騎射喜擊劍康熙甲寅三月闖賊破開化知縣崔

華起兵大來為之倡未幾賊引去六月賊復引萬餘人中夜襲城官軍過於仙霞嶺是日黑霧四塞大來從官軍馳擊之連斃數十人賊少却大來亦戰死是役也戰歿者鄭卓麟鄭振祥鄭有忻鄭毛鄭大卿鄭童戴甲毛徐義禮徐白古徐六十徐旦等共十有七人

嚴州府

宋

詹良臣

宋史本傳字元公分水人以恩得官調縉雲縣尉方臘起其黨再犯處州守貳俱棄城遁

又有他盜霍成富者用臘年號剽掠縉雲良臣曰捕盜尉職也縱不勝敢愛死乎率數十人出禦之

為所執成富誘使降良臣曰汝輩不知求生願欲降我耶昔年李順反於蜀王倫反於淮南王則反於貝州身首橫分妻子皆誅旦暮官兵至汝肉飼狗鼠矣賊怒鬻其肉使自啖之良臣吐且罵至死不絕聲贈通直郎錄其子孫二人

翁開

兩浙名賢錄壽昌人政和五年進士宣和二年攝青溪尉方臘寇起領所部與賊戰不勝被執

罵賊而死

葉鑛

嚴陵志字勉明壽昌人宣和二年方臘竊發與龍溪洪基護鄉井有功授忠訓郎瑞州軍馬都

監靖康二年金人犯闕與王時雍守東壁粘罕攻城急鑛守禦甚力沒於王事

劉晏

宋史本傳字平甫嚴州人宣和四年授通直郎金人犯京師以晏總遼東兵號赤心隊建炎初

從劉正彥擊淮西賊丁進進黨頗衆晏提赤心騎才八百乃為五色旗使旗兵持之循山而出一色盡則以一色易之賊見官軍累日不絕顏色各異不戰而降遷朝散郎正彥反晏以衆歸韓世忠世忠追正彥及苗傅於浦城以晏騎六百為疑兵賊大駭正彥就擒金人犯建康杜充兵潰晏領赤心百五十騎也青龍羣寇犯常州晏以精銳七千人出奇破之進直龍圖閣保馬跡山以捍寇寇再至選舟師迎戰降其衆千五百人戚方圍宣城晏往援至城下未立營壘出不意直擣方帳下方卻走晏欲生擒方單騎追之方率其衆迎戰晏不能敵為賊所害贈龍圖閣待制官其子四人於死所立廟曰義烈

徐梅龜

舊浙江通志字耀叟壽昌人登進士第授霍邱縣尉端平三年元兵犯境梅龜率土人王

鎔等劄寨安陽諸山保障生民鄰境亦賴以安嘉
熙元年元兵入至梅龜身先士卒俘獲甚眾次年
春元大舉入梅龜與戰不利顧謂其子尚古曰彼
眾我寡我知之矣委質為臣有死無二汝其行乎
尚古曰大人既能死忠尚古豈不能死孝乃轉戰
益力皆遇害贈宣教郎官其子汲古進武校尉尚
古贈承信郎官其子肅進義校尉
梅龜嘗著春秋指掌圖行於世

詹樾

萬厯遂安縣志至弟也舉進士官
迪功郎教授孟州死於靖康之難

鄭采翁

嚴陵志字季華壽昌人性剛果好讀書學兵
法元人圍臨安遂倡義勤王收集鄉兵與宋

潰卒設部伍習騎射義聲感激人皆效死俄而京
師失守兩宮北遷元將唆都陷建德府安撫方回
降遂犯白沙渡采翁率所部拒之力
戰數合兵敗被執仗義不屈死之

吳洪德

吳雄飛

嚴陵志字長翁淳安人淳祐九年進士累官至金部度支員外郎遇

事激烈多與時忤宋亡死難弟雄飛字次翁景定三年進士累官至太常寺簿宋亡募兵赴難死

元

陳日卿

分水縣志仕元為千夫長守禦本邑明驃騎鄧同王元取蘭谿婺源等路率兵至此日卿

力抵元之
房產俱燼

魯淵

嘉靖浙江通志字道源淳安人至正辛卯進士出丞華亭徽寇搆逆延及永平省檄淵與監郡

脫脫引兵而西焚賊壘六十餘遂會大軍於新安江中與富山巡檢邵仲華共守豪嶺賊再犯眾驚懼有退志淵以忠義相激皆固守賊不敢犯已而為賊所執守節不屈必欲求死而拘監甚固明年

寇平得脫起為浙江儒學提舉尋以疾告歸居岐山下洪武初屢徵弗就學者稱為岐山先生所著有春秋節傳策府樞要行於世列朝詩集小傳明初應召禮局辭還山王逢贈詩云相期文苑傳獨立義熙年

明

張瑛

閩書字彥華建德人以刑部郎為建寧知府署按察司事鄧茂七賊黨二千餘逼郡城結寨時

出剽掠瑛及典史鄭烈帥民夫吳保等會都指揮徐信分三路暗襲之斬首五百餘拔其寨陞右參政仍攝府事復與其季父敬提兵與茂七黨林拾得陳保戰不利死之贈按察使錄一子主簿弘治四年建守劉瑛奏請立祠祀之

張海海

兩浙名賢錄一名文淵建德人洪武初編伍營州調開平永樂十七年從興安伯徐亨備

邊俘於沙漠北主奇之欲妻以女懇辭與之官不受因入貢人至京附奏密情十四事朝廷嘉之頒旨開豁原籍仍免差徭次年得占璽欲南適適追騎甚迫乃募篆於裙幅間投璽於水至則真跡爛然馳獻召對便殿賜五品服錦衣衛千戶懇乞歸田海海在外十五年時比之蘇武

俞鑑

湯斌俞鑑傳字元器桐廬人正統壬戌進士授兵部職方主事車駕北征郎中胡寧當從行以

病求代鑑慷慨許行或曰公家遠子幼奈何輕身耶鑑厲聲曰此豈臣子言身家時乎因撫二子摩其頂曰若等自成人我不能顧矣時尚書廊柱知其賢軍事多與之謀鑑曰惟有力勸上班師耳至土木遇難而死

徐資節

舊浙江通志建德人父戌貴州正統間邊事告急分閩者置資節幕下一日問軍行進退

對曰是有伏不可遽犯督師忽其言弗用卒犯之不利而資節以死殉

汪喬年

余國禎汪喬年行畧字歲星遂安人天啓壬戌進士授主事歷陞河東兵備晉大參長泉

臺值大侵積穀平糶全活以億計特簡陝撫咨勅未至聞闖賊將窺關即日赴商確與士卒露處設險堵擊寇知有備不進未旬日而獻賊又逼鄖西亟移駐山陽截遏之總督傅宗龍全軍覆沒廷推喬年代之檄調固原臨洮及團練總帥賀人龍三鎮兵圖進取令發逆闖祖塋得一蛇斬以殉壬午賊圍左師於鄖老砦屯襄城喬年計搗其巢賊舍左師統數十萬衆逆戰賀師未陣先逸諸軍遂潰喬年曰此吾死所也帥標兵千餘保襄城城無守具賊砲矢如雨圍七晝夜城中火藥矢石皆盡援

兵不至城陷喬年握佩刀巷戰被創自刎不死賊縛詣韓家莊大罵不屈割其耳目乃死民感其忠

潛瘞莊後撫按具

題遣官覈觀還里

張連曜

舊浙江通志字景明建德人薦賢良方正授巴州同知崇禎十四年張獻忠圍巴城踰月

連曜督兵民晝夜死守知城將陷自製一寢衣謂其下曰我死爾以此覓我屍耳城陷被執大罵不屈賊磔殺之賊退果以衣得屍事聞贈奉訓大夫

邵子灼

舊浙江通志字季可建德人崇禎四年歲貢授永嘉訓導擢河南郟縣知縣張獻忠等環

攻郟縣子灼督兵死守度勢不能支整衣冠懷印綬曰此人臣致命之日也賊至不屈蹈刃死士民

立祠以祀

張日新

舊浙江通志字心白建德人崇禎五年歲貢授宿松訓導陞齊東教諭日與諸生講藝習

騎射時渠寇安守夏者倡亂日新招之降遂與同守東邑崇禎十三年齊東被圍日新守北門率其二子光尹光裔百計防禦城陷被執同子光裔死焉妻方氏聞訃奔死所有欲犯之者氏曰吾一門忠烈豈容鼠輩污我耶持匕首自刎時稱三烈

濮有宏

舊浙江通志分水人崇禎癸酉舉人授安陸知縣治為楚最流寇薄城竭力拒守闕獻二

賊合兵圍城力屈而陷夫婦幼女舉家一十九人同時殉難

王元封

舊浙江通志建德人崇禎甲戌武進士授湖廣大圍山守備流寇犯境元封單騎入賊寨

擒殺數十人賊方造飯見元封後無援兵以湯糜潑之馬仆猶步殺數人而死

國朝

翁旦

舊浙江通志字振周壽昌人通經史諳武畧順治乙未武進士累授廣西參將會稽獐蠡動旦

挺身勦之慷慨先登深入重地被圍度不免引佩刀自剄

溫州府

唐

葉一源

葉適忠烈武義侯祠記字九江其先枯之松陽人大父格心徙永嘉因家焉一源幼有志

操能詩書習騎射時唐公李淵已克長安遂募兵千餘赴太原唐公悅之使與機密事及即位授以福建道節度使貞觀二十二年太宗征高麗檄令副總管薛萬徹同往所向先登單騎陷陣斬首

二十餘級身中流矢馳歸卒帝憫之為輟食
詔所居之里建祠謚武義天后朝加封忠烈

宋

薛良顯

宋史本傳字貴勤瑞安人崇寧二年進士累
官為大宗正丞出為江東轉運使江寧軍校

周德作亂良顯聞變率眾與
戰斬十餘級力不能勝死之

丁仲修

宋史鞠嗣復傳仲修字敏之溫州人方臘黨
俞道安陷樂清將渡江仲修帥鄉兵禦諸樂

灣鄉兵失據而散仲修
以餘兵與戰力屈而死

包汝諧

周行己包汝諧傳溫州人業儒事親孝宣和
庚子方臘起睦州連陷杭歙婺諸郡至遂昌

郡守倅皆倉皇莫知計所出州學教授劉士英與
館下生石礪謀禦賊糾集義士王三錫等二十八

人汝諧與焉白諸父老曰某等雖無官守然所食皆君食也可值時變而甘不義乎乃身先士卒先

後禦賊不下數十戰竟死於難事平立專祠賜忠孝扁

張理

萬厯温州府志瑞安人宣和間寇至郡縱火延壩接橋理統兵為先鋒出城迎敵賊眾披靡俄

而橋陷溺死郡為立忠義廟祀之德祐間封忠惠侯

周承已

婁淵

潘守真

温州府志承已字恭先行己弟淵字淵明守真字適

道皆永嘉人清溪寇渡樂灣將攻城統制郭仲荀遣裨將張理帥師迎敵承已等慨然請於郡以行渡壩接橋賊鋒銳甚麾兵據橋為陣橋斷皆溺死德祐中理封節忠侯配享忠烈廟承已等三人皆從祀於旁

徐震

萬歷温州府志瑞安人宣和間睦寇至吹臺小嶺震率義兵捍衛賊眾勢盛力戰死之民為立

祠祀焉洪武初
詔加忠訓郎

吳叔沅

萬歷温州府志字雅宗瑞安人登嘉定第紹定三年知江山縣常山寇汪徐來二等犯邑

叔沅部兵戰沒贈朝奉大夫
官其二子立廟賜額忠義

黃友

宋史本傳字龍友平陽人登進士第調永嘉縣主簿攝華陰令方臘竊發友同諸將收復婺寇

復作友往諭之次浦江賊望風解去復單騎次武義一境貼然婺人圖像祀之通判澶州會金人敗盟郭藥師以軍叛燕士響應友獨領數千人與戰躬冒矢石破裂脣齒欽宗即位召對問友脣齒狀為之稱嘆進直徽猷閣制置司參謀官同种師中解太原圍友遣兵三千奪榆次得糧萬餘斛明日

大軍進榆次十里而止友急白師中地非利將三面受敵論不合友仰天嘆曰事去矣迨曉兵果四合矢石如雨敵益以鐵騎士卒奔潰敵執友勒降友厲聲曰男兒死耳遂遇害帝書忠節傳家四字旌其閭官其後八人

陳壽孫

閩書瑞安人登寶祐第授台州教授會新郡守初視篆守丞相丁大全黨也謁廟日壽孫

揚言曰冉求聚斂孔聖鼓攻守黨丞相可升夫子之堂哉守聞解印去後直龍圖閣歷福建提刑入覲與賈似道爭鹽法被劾歸里元兵至率市人禦之被執不屈死

侯昌

宋史本傳樂清人以武舉授合浦尉寶祐五年通判海州兼河南府計議官李崧壽據山東突

出漣泗昌鏖戰城下死之闔室遇害太學生言於朝即海州賜廟旌忠謚節毅仍立廟其鄉所著有

霜庄集

潘方

宋史鍾季玉傳方平陽人寶祐四年進士調監慶元府市舶慶元降附方不屈赴水死

陳元帥

萬應溫州府志逸其名宜中從子少負勇畧拜議郎理宗時屢立戰功擢大元帥德祐中

伯顏入臨安將士解體宜中張世傑奉端宗及廣王昺由越州航海而南元帥危從舟次金井灣得暴疾謂左右曰吾世受宋恩生不能報死當為厲鬼殺賊遙向帝舟叩頭長慟而逝遂葬於姥嶺之麓後屢著靈異其地立廟祀焉

陳虞之

兩浙名賢錄字雲翁永嘉人登咸淳己丑第授揚州教授歷官廣王府記室參軍積階承

議郎元兵至溫虞之率子姪鄉人千餘登芙蓉巖誓以死守不降元兵攻巖累為所敗越二歲始下

乃盡以家貲投巖隙中遂自刎死
子姪妻孥及鄉人死者八百餘人

林逢龍

林廷龍

宋史本傳逢龍字慶雲平陽人弟
廷龍字雷發俱為太學生當理宗

末元兵入侵逢龍上書陳戰守計不報咸淳中同
廷龍叩闕言事忤賈似道歸鄉里後逢龍入上封
事乞正似道誤國之罪宜急調兵解襄樊圍似道
怒削其籍押還本貫乃屏跡居山德祐丙子元兵
至溫州素聞逢龍名令軍校至山中索之遂被執
驅迫登舟入城元兵欲用之逢龍攘臂怒罵曰我
宋書生也豈為汝用哉以腹觸其刃
而死廷龍亦被執不屈同日遇害

鮑叔廉

黃綰義烈記世家樂清宋末元兵下台州叔
廉率宗族倡義兵結寨七十二據險揭旗溫

台之界曰台州雖降溫州不願為之氓元將怒用
茅畬牟氏導殺叔廉死之族無噍類遺子約已方

五歲有家奴嚴敬翁李宗善抱匿陰溝至夜躋舍後山藏叢棘中拾山果食之兵去方下長有室生

五子鮑氏遂蕃

王小觀

兩浙名賢錄瑞安人善槩每以忠義自許元兵至溫竟抵瑞安陶山小觀乃悉傾家財召

募勇敢者千餘人出陶山迎敵彼眾我寡退入小溪元兵追之力莫能當遂被執不降臨刑罵不絕口而死

劉黻

兩浙名賢錄字聲伯樂清人試入太學時丁大全為臺屬劾奏丞相董槐迫逐去國將奪其位

黻率同舍生伏闕上書言朝廷進退大臣須當以禮書上忤執政意送南安軍安置及大全貶黻還太學歷官吏部尚書兼中書舍人以憂去江上師潰起黻為端明殿學士不赴及賈似道死陳宜中

謀擁二王由溫州入海以兵逆敵共政揮涕就道及羅浮憂憤卒其妻林氏舉家蹈海死

葉爾祖

兩浙名賢錄字德平樂清人尚氣節辟史館編校晚年退居教授聞元兵渡江謂子弟曰

吾生為宋臣死為宋鬼即具衣冠望闕辭躍入所居楊樓水中

元

孔昞

萬歷溫州府志平陽人孔子五十六代孫至元三年任廣州增城縣烏石寨巡檢朱光卿反昞

捕之被殺贈從仕郎宛州判官卹其家

桂完澤

元史本傳永嘉人為平江路管軍鎮撫會賊攻昱嶺關行省令從征完澤勇於討賊凡再

戰關下皆勝尋又與賊鬪為所執其妻弟金德亦被擒皆反縛於樹臨以白刃脅之降完澤呼曰金

舅男子可死不可從賊德曰此言是因大罵賊怒剖二人之腹

謹按元史及嘉靖通志俱以完澤作桂姓而萬厯府志及舊浙江通志作季姓恐非是

彭庭堅

元史本傳瑞安人至正四年進士授承事郎同知沂州以平反獄因忤上官意遂棄去十

年以建寧路崇安縣尹起陞同知建寧路總管府事江西寇熾庭堅率兵復建陽平浦城十二年攝僉都元帥府事攻邵武寇追斬渠兇邵武悉平陞同知福建道宣慰使司副都元帥鎮邵武寇陷建寧庭堅統兵復建寧縣浙江行省檄庭堅節制建寧邵武二郡諸軍十四年盜侵政和松溪江南行臺中丞吳鐸督軍建寧檄庭堅至時鎮撫萬戶岳煥隸麾下素悍縱卒為暴庭堅欲繩以法煥懼使部卒乘其不備詐為賊兵突入交鋒衆皆潰庭堅獨留不去遂遇害民哀泣如喪父母立祠像御史

余觀上其事贈中奉大夫福建道宣慰使都元帥封忠愍侯

張庸

元史保賽音布哈傳庸字存中溫州人精太乙數會世亂以策干經畧使李國鳳承制授庸福

建行省員外郎治兵杉關頃之計事赴京師因進太乙數圖順帝喜之擢秘書少監命庸團結房山除刑部尚書仍領團結會諸寨既降庸守駱駝谷遣從事段禎請援於擴廓帖木兒不報庸獨堅守拒戰衆將潰庸無去志已而寨民李世傑執庸出降以見主將庸不屈被殺

周誠德

萬厯溫州府志平陽人方明善據溫州城屢侵平陽誠德時為樞密判官敗之香山又敗

之徐洋累官浙東道副都元帥明善深畏之乃賂遺麾下使伺於內遂被執大罵不屈明善趣左右剗其皮誠德曰雖虿粉我猶愈從爾苟活況剗皮乎尋遇害既死猶屹立兄嗣德由浙東帥府同知

屢以平寇功陞中奉大夫浙江行省參知政事亦為明善所執囚於鄞

張文貞

嘉靖浙江通志字元之瑞安人至正間禦方國珍獲功為三尖巡檢陞瑞安州判括寇吳

成士寇陶山文貞率鄉兵守天門關賊從間道至關陷文貞與弟德及姪力戰皆死里人立祠祀之

明

卓敬

劉球忠貞傳字惟恭瑞安人性至孝讀書寶香山時年十五晨昏之禮雖遠不廢會夜歸值大

風雨昏冥不知所得一兇牛憑之而歸發門乃一黑虎也時以為孝感所致登洪武戊辰進士除給事中時國初制度初立典章未備諸王服飾僭踰敬乘間白上益見器重陞戶部侍郎建文登極時太宗已封燕敬密奏亦其不意請徙封之疏入召見曰卿何得出此言燕王骨肉至親卿雖慮事

深長其謀當不及此敬叩首曰陛下以燕王為至親楊廣之於隋文不尤親乎帝默然事竟寢太宗南下敬被執首責以不迎乘輿之罪敬厲聲曰先帝若依敬言殿下豈得至此帝怒欲殺之而憐其才命中臣諷之降敬曰吾恨不得請上方斬馬劍死得見先帝於地下耳帝憐其誠猶欲生之姚廣孝不可帝意遂決命斬之夷三族臨刑從容嘆曰國家養兵三十年一旦變生畧無措置敬死有餘罪但恨不為兵官得少行其志耳神色凜然經日如生敬博學多能雖天文律厯地理兵刑靡不各造其與尤邃性理有遺書十卷發明周子通書邵子經世之學詩文五十卷沒入之日惟書畫數軸爾

鄭士達

萬厯溫州府志字達世瑞安人洪武二十六年以貢任肥鄉訓導靖難師南下徇廣平有

議迎附者達殺然曰我儒官也若隨風效順謂綱常何激守臣相與堅壁以守不克棄官歸永樂三年詔逮諸逆命者達竟坐戍右屯衛聞命慷慨而行歿於戍所

黃養正

萬厯溫州府志名蒙以字行瑞安人國子學正潮光子永樂中授中書舍人累官太常少

卿性端謹博學工詩文宣宗甚愛之南還時執手賦詩以別正統己巳之變先事陳言弗從及扈駕土木也先衝逼行營驚怖養正獨毅然衛護無所畏避至駕北狩死之天順初追贈太常卿錄其子一人世襲錦衣百戶

鮑輝

湯斌鮑輝傳字淑大平陽人宣德癸丑進士授工科給事中改刑科上言有司抑配鹽商斂怨

於上州縣官考滿貢綠保留宜禁止之畿輔山陝飢請命大臣亟賑之寬其徭役正統間海內久安

武事漸弛上言奸宄之伏恆於承平時天下都司衛所官溺於晏安器具不修軍士靡恤冒支糧餉規避徵發比者延平寇起朝命兩都司調軍征進遷延旬月及臨陣輒復畏縮乞敕兵部議下巡按及清軍御史會同都司官大加簡閱推擇公忠智勇者為之將領庶武備可飭朝廷是其言下所司行之車駕北征輝督右掖軍紀戰功師潰土木死焉

江德歸

舊浙江通志字君壽泰順人正統時山寇剽掠首倡義兵率鄉民禦之遇害于佛保年十

八矢志復讐尚書孫原貞領大軍至收置幕府命統所部殲之寇平授贊畫

王沛

溫州府志字子大澈季弟少業儒棄去精醫術授益府良醫個儻尚氣節嘉靖壬子倭亂沛謀

諸鄉族集兵為守寇被創逸去戊午復至勢張甚沛率鄉兵禦之遇害贈太僕寺丞立祠祀之賜額

愍忠錄其子
叔本國學生

王德

兩浙名賢錄字汝修永嘉人弱冠成進士授東昌府推官擢給事中即勸上簡內閣輔臣失執

政意上方畧十餘事稱旨出募兵山東為諸道最會新太宰上事德投刺少殺其禮太宰以為強項而惡之遂承執政旨出德為廣東按察司僉事數選練驍銳以軍法約束之身入諸徭寨所殺捕過當後歸適倭亂從其宗人豪散資財募兵為廬井捍嘗一再敗之最後失其豪奮厲益前而郡援不至遂敗猶手殺數人罵賊以死贈太僕少卿賜祠祭額曰愍忠官其子錦衣百戶

趙連

侯一元烈士傳樂清人嘉靖壬子倭寇海上連聞難持挺出擊連仆數賊遂突入其陣意氣彌

厲一賊出於廁鏖連以矛傷腋悶絕與歸猶呼其左右曰賊可擊也蓋掖我起行數百步踣踴高

岸圍頓乃還且死家人環而哭之連張目曰勿哭人百年會有一死吾有以死矣語畢乃絕

林田

溫州府志字舜耕泰順庠生嘉靖己未倭入寇至雅洋將抵縣田率鄉兵禦於排嶺賊掩至整

兵力戰而死贈州同知建祠立祀

李大韶

溫州府志字舜廷樂清人設教平陽從學者衆因家焉天啓己丑歲貢考授通判憤魏璫

之橫與蔡廣叩閤上書璫怒逮蔡論斬大韶繫獄而卒子應察奔計扶柩歸至濟河舟覆以索自縛與樞相聯飄流數十里得援若有掖之者既而大韶妻楊氏病應察剗股以進弟應官燕臂額天刺指血和藥尋愈應官妻吳氏死於節一門以忠孝節烈稱

章一焯

溫州府志字陟瞻樂清人天啓選貢授湖廣耒陽知縣性公直不容於時解綬歸居鄉恂

謹稱長者會寇亂焚其廬且脅之去一焯以死自誓奔赤城題詩太平門外沈河而死

林宗椿

舊浙江通志字君靈泰順庠生崇禎十二年山寇竊發劫縣之仙居屯三日不去宗椿率

鄉兵直前連斬數級賊氣奪將遁宗椿欲盡殲之引賊至澗逼橋而陣橋壞失足橋下賊蜂刺之怒

罵不絕口遂死賊亦引去邑人立祠致祭

鄒欽堯

温州府志字維則瑞安庠生徙居永康甲申闖變作書別其父自沈永寧江而死

葉上高

温州府志字而栗永嘉人郡庠生負氣節聞闖賊陷京師失志佯狂以言語抵觸有司繫

獄會端陽賦詩有未吞蒲酒心先醉弗浴蘭湯骨已香之句遂仰藥而卒

王瑞梅

舊浙江通志字廷範永嘉人天啓進士兩任河間蘇州推官皆以剛直著聲晉樞曹郎以

邊才簡授鄖襄兵備張獻忠受創於左良玉奔轂城乞撫當事皆為所愚瑞栢獨條賊宜勦與可勦狀及勢不可阻乃條解散歸農隨征三款乘城治兵防禦益力賊畏忌不敢動會丁內艱歸悉如所料明末避亂山中已而沐浴辭廟賦絕命詞投繯而卒

國朝

曾三鳳

溫州府志泰順人順治丙戌山寇焚劫鄉都各村立甲會勦三鳳率鄉兵禦之賊勢張甚

奮身殺敵死之弟三重繼死弟三益又繼之一門忠義鄉人立祠祀焉

侯贈祖

旌忠冊樂清人康熙十五年閩亂偽帥某謀襲寧波贈祖偵知之以告知縣盛應宗令密

祥報郡為賊邏者所獲賊恚甚殺於市

處州府

宋

祝汝秩

括蒼彙紀字君禮麗水人宣和中方臘起睦州寇諸郡汝秩詣闕上書乞為討賊先鋒補

承信郎即領兵解郭太尉園破仇道人洞至台州復捕臘餘黨為賊所害

趙育才

括蒼彙紀遂昌人政和中為武學生膂力絕倫方臘叛育才與鄧熹父子集趨壯相犄角

邑人恃以不亂時松陽羣盜侵掠及邑乃率所部格於孟山前賊勢張甚手射殺數輩死於礮下

祝公明

宋史王士言傳公明麗水人為太原府孟縣主簿靖康間金人犯河東令棄官去公明攝

縣事率保甲入援國守踰年城陷不屈死子唐為陶州司戶中原失守唐亦死官所建炎中贈公明

承事郎

姜綬

宋史本傳麗水人金人再犯京師朝廷募勇士齋蠟書往南京總管司調兵赴援綬以忠翊郎

應募乃封股藏書絀下南壁為邏騎所獲厲聲叱罵遂被害建炎中官其子特立承信郎

劉倚友

兩浙名賢錄字夢澤青田人政和進士宰閭封有聲靖康初金人犯闕受檄為東壁彈劾

官登城按視為金人所獲脅使降罵不絕口死之

吳樞

兩浙名賢錄慶元人政和進士靖康初詔募人使金者樞毅然請行既至惟長揖不拜金人欲

烹之鼎油方沸樞攝衣從之顏色無少變金主壯其節遣還

何紱

括蒼景紀字叔章麗水人靖康初金人犯汴詔募義勇紱率土豪百人應募補進義副尉至潁

上縣三合戰馬奔為
柘木所支遂陷陣

祝永之

括蒼彙紀字栲年麗水人以世賞授和州尉
靖康初金人入和州守令俱遁永之獨部鄉

民城守盡室被害州人乃
推永之為守後知滁州

詹友

括蒼彙紀縉雲人以父適廢知雍州靖康中
金人犯汴友從北狩金授以官不就死之

吳安國

宋史崔縱傳安國字鎮卿處州人太學進士
累遷考功郎官以太常少卿使金值金人渝

盟拘留脅服之安國毅然正色曰我首可得我節
不可奪惟知竭誠死王事王命焉敢辱金人不敢

犯遣還後
知袁州卒

周格

萬厯杭州府志處州人直秘閣浙西提刑建炎
元年討叛卒陳通與子肇至俱遇害高宗嘉其

節贈官

牧葬

龔楫

宋史本傳字濟道遂昌人兵部侍郎原之孫建炎初聞金人陷郡縣輒憤恚不食兀术據和州

以偏師萬人築堡新塘遏絕濡須之路楫率家僮襲之鄉里從者三千餘人獲千戶二繫累者數百人輜重稱是金兵大至乃取道圩上金騎兵據其衝不得前衆多赴水死楫麾其衆曰今日鬪死亦足稱義士自棄溝瀆無益也戰敗為金人所獲猶挺劍刺其一人罵不絕口金人嚮割之

章雲就

嘉靖浙江通志麗水人建炎四年潰兵宮儀破婺州將逼郡境州將梁頤吉募能說賊者

雲就應命往遇賊於荆坑喻以禍福賊許諾與俱至城下會官軍掩襲賊以為賣己殺之

張漳

括蒼景紀龍泉人紹興初以秉義郎充金國通問副使金人脅以拜跪正使唯唯漳獨不屈遂

遇害上嘉其忠節官
其子越為保義郎

朱光

兩浙名賢錄字不應麗水人紹定三年進士尉
裏陽攝均州錄事端平丙申均倖王用吉以城

叛光論之不從責之又不得
遂死於難贈通直郎官一子

鮑廉

括蒼景紀侍郎鮑度兄
知臨江軍守城而死

梅寬夫

括蒼景紀字伯大縉雲人調慈谿尉德祐初
攝知縣事率義勇應文天祥至常州戰死嘗

師滕璘得考亭之學所
著裕堂講義刻於鄉校

柳味道

兩浙名賢錄雲和人好讀書每以節義自持
時有寇柳機察作逆逼味道為主堅誓不從

寇怒縊於松以脅之味道從容口占一詩曰國破
家亦破年窮命亦窮浮雲諸逆賊送我上青松竟

縊死

松下

林融

雨浙名賢錄青田人仕宋為提刑痛宋社淪亡潛歸九都牙陽起兵興復兵敗被擒送燕世祖

義而釋之融歸復起兵元遣參政高興來禦力屈死之

元

徐伯龍

崇禎處州府志青田人至正甲午賊起總管官王某將兵抵南田怯不敢進伯龍詣軍門

請以身先官軍殺賊總管官授以松陽縣尉牒明日大戰自旦達暮數十合兵勢少却伯龍直前斬數十首為賊眾所殺其妻夏氏以貞節聞

洪度

崇禎處州府志字克明青田人至正間由儒士授温州竹木場提舉時方國珍寇温州度欲往

行省請計未行匿於蘿峯下國
珍獲之罵不絕口引刀自刎

張進九

兩浙名賢錄青田人世業農敦樸有至行至
正乙未八都盜起進九被縛使前誘衆降進

九怒呼曰諸人速來殺此八都賊賊
加刃於頸令如己言卒不屈竟被殺

王毅

宋淵王毅傳字剛叔自號木訥其先自琅瑯徙
居處之龍泉毅六歲知書以躬行實踐為教發

明本心之學至正中荆襄兵起直犯縣南鄙毅畫
八策贊將軍石抹宜孫破之未幾盜發青田揚言
來攻縣長吏寶忽丁遁盜遂深入焚官舍剽掠至
雞犬穀召門人章溢部勒鄉民為兵逐殺之俄部
使者下令正丁罪丁恚集惡少據險阻以方命首
害毅於家括蒼景紀毅讀朱子書慨然以師道自
任一時遊其門者章溢胡深徐操
李汶等為國元勲有木訥集行世

明

葉琛

嘉靖浙江通志字景淵麗水人博學多才與劉基章濫齊名明太祖遣使以幣聘之與基濫宋

漁四人同至金陵上顧左司郎中陶安問曰四人何如安對曰臣謀畧不及劉基學問不及宋濬治民之才不及章濫葉琛擢琛為營田僉事壬寅正月上帥師至龍興守臣祝宗康泰以城降改龍興為洪都府以琛知府事既而宗泰據洪都叛琛迎戰死之追封南陽郡侯命有司立廟城中歲時祭之

胡琛

王穉胡琛行述字仲淵龍泉人少好學於書無所不讀上遣胡大海取處州軍入城琛挺身見

大海而四縣得不受兵上素聞其名召至南京擢中書省左司員外郎命總制處州已而浙西將李

伯貞大舉入寇城堅不可攻乃引去温州方明善
取平陽深出偏師勝之并復瑞安所侵地而親統
大軍攻溫州明善勢蹙與其叔國珍議歲貢有旨
俾班師乃入覲除王府參軍仍總制處州乙巳福
建陳友定寇邊深往征之破其二柵友定甚相禮待
精銳來圍深突陣與戰馬蹶被執友定甚相禮待
深因具道主上神聖援竇融故事以感動之會元
使至督迫遂遇害上遣官即其家祭之追封縉雲
郡伯子楨為宣武將
軍僉處衛指揮司事

厲子溫

兩浙名賢錄青田人明初以明經擢監察御史糾劾不避權要洪武癸丑命踏湖州水荒

以實復命上曰前使者曰無爾獨曰有何也對曰
天知地知臣知君獨不知上怒其言不遜斬之後
果如其言因罪前使者而御書
於午門曰豪傑御史厲子溫

章存道

名山藏龍泉人謚之子謚退處匡山屬存道

劉基宋濂並使聘之存道亦以數擊却陳友定有戰功授處州翼元帥副使以功授處州指揮副使從征泰隴取興元留守之擊敗蜀將吳友仁再守平陽轉左衛指揮同知從湯和北征哈噉不刺營戰失利死

李珍

括蒼景紀青田人性驍勇元末寇掠郡邑珍率衆禦敵於邑西自旦至暮斬獲無算援兵不及

遂遇害詔贈臘源寨巡檢

劉璟

吾學編字仲璟基子喜談兵究韜畧賊葉丁香叛延安侯唐勝宗討之決策於璟破賊還薦璟才畧上喜曰璟真伯溫子矣金書除奸敵佞四字於鐵簡賜之命曰百官不法持此糾正會谷王

封宣德府授谷府長史并敕提調肅遼慶寧燕趙
六王府事璟常至燕文皇與奕璟勝文皇曰卿獨
不少讓我耶璟正色曰可讓處璟不敢不讓不可
讓處璟不敢讓靖難兵起璟馳還京獻十六策不
聽令參李景隆軍事景隆又不聽景隆戰敗璟夜
半渡蘆溝河水陷馬斃璟跳岸冒雪走良鄉裂趾
跛行三十里璟子猶自大同赴難越良鄉至涿州
遇璟翼璟上馬奔還家養疾建文二年璟與疾赴
闕進聞見錄千萬言人不聽令璟還家待用明年
六月建文遜位璟稱疾不起法官論璟逃叛逮至
京見上猶稱殿下下詔獄自經死法官希旨緣坐
其家上不許得歸葬嘉靖乙酉提學副使萬潮肖
像配享

文成祠

葉希賢

嘉靖浙江通志一名雲松陽人洪武中舉賢
良任御史士午之變家人驚潰相失疑其已

死乃發喪以衣冠歸葬希賢實從亡在外隱姓名
削髮為僧好事者為建刹於蜀之重慶松栢灘以
居之朝夕誦經呪其徒諦聽之則易之乾卦也或
時放舟中流朗誦楚詞投之水而哭焉號雪庵和
尚時有補鍋匠者不知何許人亦毀形韜迹往來
隆安里間竟佯狂以死蓋葉之僚友同出亡者

劉原熊

括蒼葉紀松陽人父維賢捐資倡築獨山百
仞堰建永安橋置澄川渡立祭田正統間陶

得義等倡亂男女多避難於橫山寨寨近澄川守
寨者素聞原熊剛毅各捐簪珥求為禦護原熊却
之曰賊因財而致亂子復因亂而受財相去幾何
即椎牛注酒構集鄉人會盟於社原熊執爨前戰
賊懼退居城北次日忽乘機劫寨原熊又力
戰於野斬賊魁四級陣亡鄉人哀之祀於社

項民彝

括蒼葉紀字善恆松陽人狀貌修偉以明經
授監察御史上以皇太孫英明欲特授應服

民彝抗疏諫上怒罷朝時天大雪民彝俯伏不敢
起上入宮復取其疏讀之感悟命宦官搜於雪消
陷處得之四肢已僵敕光祿寺調護尋以疾終上
一日問侍臣曰何久不見長御史對曰已死矣嘆
息久之

時誌

括蒼彙紀遂昌人正統間礦賊攻縣治誌兄哲
散金募兵率誌邀擊於麻車嶺誌死之哲力戰

却賊郡司上其功
授馬步司巡檢

葉德良

崇禎處州府志字克復遂昌人由吏員任蒲
田縣丞嘉靖中倭寇福建時知縣簿尉棄城

走獨德良堅守旬日力竭城陷
死之贈太僕寺丞廕一子入監

吳南明

慶元縣志字君治崇禎間任湖廣黃岡丞時
流賊數十萬所過郡縣盡破適縣缺令人勸

之去南明曰吾職雖卑忠義則一遂率兵民固守
月餘糧盡城陷被執不屈賊怒割其鼻并兩耳愈
不屈截其左手血悶死賊
退半日復虺歸家二年卒

詹嘉言

松陽縣志字心聲少以忠義自許訓導象山
流寇游警與令分陴共守屢出奇計佐令平

寇手著墨守書及海外篇轉蒼溪教諭流賊破隣
封忽雨集城圯難守嘉言遣子瑗懷印出間道賊
至誘逼之不為動正辭詈賊死
贈國子助教建祠於學之舊基

程必進

松陽縣志號景雲以拔貢除贛州訓導城失
守遂冠帶南向拜赴水死子矩泣曰父死忠

子烏可不死
孝次日亦死

國朝

吳詔功

吳壽男

舊浙江通志慶元人康熙十四年耿逆陷慶元從吳陳仁起義兵死

旨優卹廕

難奉

詔功子顯宗壽男子嬰捷俱千總

周茂覺

山西名宦冊浙江人順治初任垣曲縣典史姜逆之亂死於城守

王之佐

山西名宦冊浙江人順治二年任臨縣典史城陷知縣張耀祖死之佐領民兵急趨上

趙寨誓擒渠魁以圖恢復
力不支為賊所獲罵賊死

徐士鶚

山西名宦冊浙江人順治六年任大寧縣典史姜逆之亂城破死之妻子亦偕死

戴真學

福建名宦冊浙江人順治三年隨征入閩授漳平令邑在萬山中寇四起且撫且禦寇不

能犯五年賊王錫等擁眾萬餘逼城下六月城潰
方夜半真學出巡見勢不支急歸手刃其妻出戰

為賊所殺

錢嘉倫

福建名宦冊浙江人舉人順治三年知順昌縣土寇竄起悉力禦之城陷投繯死

鮑之奇

廣東名宦冊浙江人順治七年以明經知恩平縣縣先為賊據遂即任於凹頭村之奇屢

謀入城五圍民遮道泣留不聽一日單騎詣之宣布惡德賑恤窮黎民皆感悅賊憚其得民令黨何

國佐殺之死之日血漂於地鼠食之皆自斃國佐忽發狂死

謹按周茂覺以下六人皆各省移咨新志所載冊內止開浙江人未詳何府縣屬而皆為國捐軀者

自不容泯沒故統載於十一屬之後

浙江通志卷一百六十六

謹案卷一百六十四第十三頁前六行取倭刃追殺一魁刊本追訛迄今改

第十四頁後六行此吾授命處也刊本授訛受今改

第二十五頁後七行贈文華閣待制刊本文華二字倒誤今改

第四十頁後一行擢木營刊本擢訛羅據杭州府志改

[illegible]

欽定四庫全書

史部

浙江通志卷一百六十七

詳校官給事中_臣戴璐

檢討_臣德生覆勘

總校官編修_臣倉聖脉

校對官庶吉士_臣潘庭筠

謄錄監生_臣薛振基

欽定四庫全書

浙江通志卷一百六十七

人物

循吏一

自遷史傳循吏而後世史家多因之顧其言要於
奉法循理初非有驚竒難能之事以震世而駭俗
也東南美逾竹箭不乏政事之材然必如孟堅所
云淑人君子民有餘思者乃足稱焉詩不云乎不

競不綌不剛不柔布政優優雖奕世而下猶旦暮
遇之志循吏

杭州府

南北朝

范述曾

梁書本傳字子元錢唐人齊明帝時出為永嘉太守為政清平不尚威猛民俗便之所部

橫陽縣山谷險峻為逋逃所聚前後二千石討捕莫能息述曾下車開示恩信凡諸凶黨襁負而出編戶屬籍者二百餘家自是商賈流通居民安業在郡勵志清白不受饋遺帝聞甚嘉之徵為游擊將軍郡送故舊錢二十餘萬述曾一無所受始之郡不將家屬及還吏無荷擔者民無老少皆出拜

辭號哭聞於數十里東昏時還鄉里高祖踐阼詔
曰中散大夫范述曾昔在齊世忠直奉主往涖永
嘉治身廉約宜加禮秩以厲清操可大中大夫賜絹二十匹

宋

謝濤

范仲淹謝濤墓碑字濟之富陽人淳化三年進
士除梓州權鹽院判官會盜據成都發其徒攻

縣濤守備既堅十旬弗破事平就遷觀察推官權
知益之華陽縣時寇亂之餘民多散亡上言者請
募人占田可倍其租朝廷從之於是有力者得并
其田濤曰奪民世產以資富人豈朝廷意耶乃盡
取其田以歸於民真宗即位召試學士院會京東
有強寇而曹南闕守遂命濤往至郡稱治寇不敢
犯有趙諫者出入都下務乘人之弊以告訐濤奏
之斬都市乃下詔曰凡民非干已事無得告言遂

著為令自是天下訟息而刑清厯遷兵部員外郎
出為兩浙轉運使恥尚文法雖任在按察而誠意
坦然吏樂其職民安其俗還臺進禮部郎中兼侍
御史知雜事清靜端介百辟望其風采乾興初進

吏部郎中直昭文
館遷太子賓客

郎簡

宋史本傳字叔廉臨安人舉進士第知寧國縣
徙福清縣有石塘陂久湮塞簡募民復築溉廢

田百餘頃邑人為立生祠知賓州有縣吏死子幼
贅壻偽為券冒有其資子長屢訴不得直訟於朝

下簡劾治簡示以舊牘曰此爾翁書耶曰然又取
偽券示之弗類也始伏罪徙藤州興學養士一變
其俗藤自是始有舉進士者知廣州
捕斬賊馮佐臣厯右諫議大夫致仕

元奉宗

范仲淹元奉宗墓誌字知禮餘杭人景德中
甲科初命歙州知績溪縣事再命常州武進

令皆以廉愛稱遷知通州海門縣入拜尚書屯田員外郎告歸卒在海門日邑有大瀆亘數十里堙而不治奉宗抗議藉力導至於海人咸利焉

謝景初

於越新編自大理丞出知餘姚民所利病相緩急設方畧北偏瀕海為築堤捍之豪強率

侵湖為田具奏禁止民又爭水泉乃創立規繩簿記其高下廣狹啓閉晷刻令各鄉遵守名曰湖經有盜湖爭利者證經乃息瀕海多盜煮海乃頒示約束令民無失利法亦罔忤而鹽課倍昔又飭厲學官化誨子弟時景初知餘姚其弟師立知會稽王介甫知鄞韓玉汝知錢塘皆有聲吳越稱四賢云兩浙名賢錄富陽人絳之子慶厯十年甲科及第以大理評事知餘姚縣遷益州路提點刑獄以屯田郎致仕博學能文尤長於詩壻黃廷堅自謂從謝公得句法

唐肅

宋史本傳字叔元錢塘人舉進士調郿縣主簿徙秦州司理參軍有商人寓逆旅而同宿者殺

人亡去商夜聞人聲往視之血沾衣為捕吏所執州趣獄具肅探知其寃持之不數日果得殺人者

後為龍圖閣待制登
聞檢院知審刑院

韋驤

武林紀事字子駿錢塘人皇祐五年進士以薦擢利州路運判移福建路年饑不俟奏聞亟發

倉廩賑活甚衆閩盜熾驤設方畧捕獲
誅之召為主客郎中出知明州乞祠

沈遘

東都事畧字字文通錢塘人舉進士通判江寧府遷知杭州為人疏雋博達明於吏治令行禁止

民或貧不能葬給以公錢嫁子女數百人倡優養良家子者奪歸其父母善遇僚寀皆傾心為之耳目刺閭巷長短纖悉必知事來立斷召知開封府治如在杭州拜翰林學士判流內銓丁母憂歸

黃黼

宋史本傳字元章餘杭人累遷太常博士除兩浙路轉運副使浙東瀕海之田以旱澇告常平

儲蓄不足黼捐漕計貸之毘陵饑民取糠粃雜草根以充食郡縣不以聞黼取民食以進乞捐僧牒

緡錢賑濟所全活甚衆

麋弁

黃氏日鈔字仲昭富陽人開慶中知建昌軍民詞數千立剖決皆洞見其情蠲未催苗三千餘

石豪族有誣民為盜者獄已具弁直之武斷之民遂戢

元

楊瑀

楊維楨楊瑀墓碑字元誠杭人天厯間擢中瑞司典簿帝愛其廉慎有深沈之思嘗謂薩木丹

巴勒曰楊瑀有謀事必咨之超授奉議大夫太史院判官至正乙未江東浙西盜羣嘯乃改建德路

總管建德在萬山中屬邑淳安又連歙境賊由歙
窺界而邏者疑長樂鄉民為盜執以歸諸獄連數
百家民益洶洶主帥者謀往捕瑞不可曰倘因疑
枉鼓衆亂賊得乘釁突來悔焉及我請撫之果不
測當任其咎遂肩輿從數隸直抵淳安邑人嘗厄
官軍抄掠散匿山谷間瑞載米二百石聲言賑濟
使縣令馳諭民皆歡呼持牛酒來拜瑞喜曰吾固
知民不吾負即日還瑞蒞郡視之如家民亦視如
父母其像而祠者凡十有四所
行省最其功進階中奉大夫

林堅

蘇天爵林堅墓碑字仲實錢塘人大德初授常
湖茶園副提舉茶戶歲貢有常有司又復役之

皆以為苦堅聞於朝即蠲其役陞承直郎中政院
斷事官用刑惟務寬平或有鞫問第以情求之不
事撈掠進階承德郎致仕堅為人慈祥愷悌嘗奉
旨監製茶品於閩前為使者指以尚食需索多端

民不勝擾堅以廉自律復為戢其
撓政者民甚安之頌其美於石

孫德潤

兩浙名賢錄字以誠錢塘人由江浙行省掾
史為處州松陽令先是縣籍失實力役無稽

民困於徭役德潤力行計畝均役之法以方田履
其頃畝以土會等其磽沃以出賦定役籍既具適

南北多事徵斂旁午縣
惟按籍征之民大悅

明

周斌

萬歷杭州府志錢塘人洪武初知登州九年陞
州為府遂遷知府登地並海民瘠斌撫綏有方

民日熙阜勸學崇教使海陬僻
壤興於禮義吏民咸化服之

王思祖

兩浙名賢錄仁和人洪武初為安州同知尋
進知州在州十年餘為政廉平公慎簡易近

民國初甫離兵燹萬事草創凡學校社稷壇壝多
所創建思祖撫循綏靖民不告勞嘗手植柏數千
章至今民蔭其樹而思之不啻甘棠也卒於
官子孫貧不能歸因家於安遂為安州人

梁大舉
萬歷杭州府志字仲仁錢塘人洪武間以人
材授陝州判官卓有異政清白聞遠通以母

老歸

趙文
廣西通志字夢得錢塘人洪武七年知藤州廉
以自持誠以待物政尚仁恕秩滿去民有言及

者輒
流涕

李貞
萬歷杭州府志海寧人洪武間補弟子員宣宗
朝為揚州知府三載章累百上民被其澤考績

入覲以疾乞歸謝還初所賜勅諭上曰知府無與
勅者與爾以旌賢也其傳示子孫以見朕優禮之

意既歸家
徒四壁立

湛禮

萬厯杭州府志字用和錢塘人永樂甲申進士授內江縣知縣陞大理評事再遷知韶州府韶

歲貢藤而產於渤海禮疏於朝得免貢又曲江豪民二十餘戶皆投充軍戶以免糧差禮乃列其狀以聞事得勘正嘗遣吏卒往樂昌督稅法外需求無已令械繫以來禮下教曰暴橫殃民法所必禁令能不以府役故屈法貸之其賢可知由是府役至邑皆斂戢不敢肆甲乙訟田禮斷歸乙甲復誣訴藩司知其偽命禮按致其罪禮慰遣令去約五日乃來辨析竟亦不加罪也其寬厚如此清白自持始終無替及引年歸貧乏不能自存

周文

嘉靖仁和縣志字宗武永樂二年進士選庶吉士改擢湖廣布政司參議聽訟明決人稱無冤

分守武昌道時黃州荒旱餓殍載道文多方籌畫一方賴以全活無何卒於任民哭弔為服以送歸櫬

何湏

萬厯杭州府志字彥容仁和人永樂甲申進士官刑曹郎持法嚴不撓貴勢京師為之語曰毋

縱誕避何鐵面受知成祖每大獄親呼湏名使決之出知辰州裁抑豪強凡鎮守總戎殘擾市肆者悉舉正其罪民立生祠以祀

俞益

兩浙名賢錄字友謙臨安人永樂甲申進士選庶吉士預修永樂大典授靖安知縣有惠政改

潯山大興學校造士多為聞人秩滿當去邑民千數詣闕乞留再任卒於官室如懸磬至無以為斂吏民哀慕而助給之始克襄事歸

傅潤

萬歷杭州府志字克溫仁和人永樂丁酉舉人授滄州同知廉明服人能白誣獄有傳城隍之

稱以薦擢保安知州正統初中貴王振用事振姪顯順怙勢侵奪民產莫敢誰何潤廉得其實竟置

之法及入計復不為餽遺振銜之以廉無可指再逾期振喉總兵者委潤備糧瘁疾而卒

周安

萬歷杭州府志字元靜仁和人永樂中以國子生授刑部主事陞郎中精聽讞慎刑法務得獄

情以是陸無冤繫擢江西按察司副使夫志清白歷官二十餘年家無尺寸之儲

陳敏政

兩浙名賢錄字志行其先長興人後卜居仁和宣德丁未進士初授潛江知縣為政廉平

不苛四民樂業賢聲蔚起再轉至南康知府宅心公正輔善抑強復社倉修石堤建白鹿書院百廢具興郡人德之子良器官至應天府尹

沈和

兩湖廩談字用禮仁和人正統乙丑進士累遷刑部郎中居官持法不撓曹吉祥恃勢時其麾

下卒姦人妻為親夫所殺吉祥必欲致其夫死和執不從竟俱下詔獄門達苦煨之終不引伏降通

判以去後擢撫州知府致仕

朱鏞

兩浙名賢錄字廷用仁和人景泰辛未進士授南京兵部主事歷郎中出知廬州時合肥僧殺

其師舒城民婦以姦殺其夫六安民殺從弟皆誣坐他人鏞至閱成案逮治廉得實俱改坐御史驚以為神秩滿陞廣西參政適鬱林賊起督撫統兵往征命鏞紀功師還感疾遂致仕歸

孫暉

兩浙名賢錄字景章海寧人景泰壬申以賢良方正薦授江西泰和縣丞嘗親定徭役旦夕令

下請託不及行人稱為霹靂手指其牒為鐵板榜文言其公平允當不可更易也擢博白縣知縣韓

雍征大藤峽障從行多著勞績超授潯州知府歲饑米價翔湧出公廩粟減值以惠饑民屬邑有為民蠹者悉置諸法邊郡大治擢山東右叅政致仕

邵琮

萬厯杭州府志字叔璋仁和人天順庚辰進士授大理評事諫劾多所平反累陞湖廣僉事時

武岡諸縣初熾於兵琮至竭力撫綏築城建縣士民倚之入運奇設策擒擒孝感巨寇李善境內帖然陞四川按察司副使俗善告訐而琮聽斷精核庭無留獄至於抑陳謙之橫雪李明之寃尤其著者未幾致政歸

方銓

嘉靖浙江通志字景衡新城人天順壬午舉人任安陸州學正治易以專門授諸生其有習他

經者訪鄰郡明經之士為具幣往卒業焉一言一行必步趨先民凡教人悉以身先之多所成就從

子源弘治間鄉貢授侯官訓導陞建寧教諭訓士
一如詮法溥以舉人歷任婺源龍溪知縣所至皆
有聲一時稱善政善
教者必曰方氏云

陸偉

錢塘縣志補字仲奇成化乙酉舉人授澤州知
州時州罹存饑人相食偉奏發內帑沿門賑救

區畫纖悉全活者數萬州有寧山衛軍民雜處恒
患不靖偉憫之以威彼此帖然葺州治新儒學至
漏澤園常平諸倉路塗橋梁靡不備舉致
仕歸州民攀留數十里不絕車至不得行

錢鉞

河南通志字大用仁和人成化中知汝寧府事
至皆自剗決吏胥無所容其奸暇則行縣教民

開陂堰勤種植歲獲其利於是逋亡歸者戶八
千有奇郡內熙然稱治在任九年陞陝西參政

沈禎

兩湖塵談字天祐仁和人以貢生授香河訓導
正德初流寇起禎上疏請城香河奏下巡撫即

以委禎禎旦暮躬蒞版
築乃成冠至賴以安

祝萃

萬歷杭州府志字維真海寧人成化甲辰進士授刑部主事改工部從徐侍郎貫治水吳中發

卒二十萬綜理有方士卒樂為之用進虞衡司員外郎嘗上疏請上親禮儒臣以資啓沃詞甚剴切

不報乃疏乞歸養正德壬申起為陝西提學副使進廣東左參政遂解官歸

沈儀

萬歷杭州府志字懋德仁和人正德己卯舉人授清江縣知縣安靜不擾吏民歡樂之督學使

者徐階行部至清江見其衣冠樸野心頗易之居數日則察其六事修舉所守卓然乃歎曰設吾以皮相天下士幾失賢令矣

陞惠州府通判投劾歸

許仁

萬歷杭州府志字元夫仁和人正德庚辰以舉人授巢縣教諭擢河南鄆城令雪冤獄減重徭

弭盜捍患勤於撫綏以性狷執不能事上官調德化德化瘴鄉民獮悍難治仁一以簡重鎮之毀淫

祠改社學建公署導埂渠勞績顯著
調同安豪右以舊憾騰謗遂罷去

許應元

獻徵錄字子春錢塘人嘉靖壬辰進士當選庶吉士執政者欲一見應元不往曰吾始仕

也而偃倭鼎貴之門冒謁干進哉坐是竟不得館職出知泰安州有豪右觸死法賂權貴人以請應

元不為撓竟斃之廉白自持苞苴斷絕擢工部員外郎遷夔州府知府夔當楚蜀孔道號難治應元

馴以廉靖時斥其桀黠者法之郡以蘇息治為一道最擢四川按察副使調廣西已又攝兵府江巨

寇莫氏兄弟三人以雄勇名兩粵間往歲嘗大嘯聚破城殺吏討之漏刃去前兵備以擒獲報而罷

兵及是復出益猖獗應元設方畧購土人決旬而三兇授首江道底寧轉雲南布政徙廣西

高應冕

馬三才高應冕傳字文中仁和人嘉靖甲午舉人選湖廣綏寧令務寬卹懲豪右設預備

倉建虎谿書院麻陽兵變應冕調監司請單騎往諭皆叩首棄兵改刺光州延見父老察民疾苦除舖戶雜派捐權稅之無藝者盜魁鄭某大族也計擒而錮諸獄其黨烏獸散始視事時老掾吏抱疑牘嘗之立為剖決於是訟堂間然以養母乞歸

姚良弼

兩浙名賢錄字夢賢錢塘人嘉靖乙未進士授南刑部主事出知惠州先是嶺海間多盜

良弼請募民兵團保伍每隘列柵建樓懸鼓其上令曰遇盜發某處輒登樓擊鼓餘隘聞各鳴鼓應之然後陳兵守隘盜至即擒者賞縱者與盜同罪於是盜悉解散民得安枕旋擢雲南按察副使歸

許貫之

萬歷杭州府志字道卿錢塘人嘉靖乙未進士授吉水令時按浙使者吉水人也意有所

屬即欲酬以漸事以微言諷之貫之曰如此則類
貿易有市心矣拒不可愛民若子權貴干請一切
謝絕治行為江右冠徵入為兵科給事中將去官
出已資葺解宇繕完器具以待後尹曰吾不忍重
勞民也其瘠
已厚民若此

翁相

獻徵錄字輔卿錢塘人舉進士授虞衡司主事
改刑部郎中出守廣平郡故多盜白晝劫獄殺
畧吏民相擒一二盜魁餘悉下教原之盜遂平時
歲祲河北諸郡饑甚相不及檄聞輒開倉放賑全

活者數萬人治行
冠河北以病免歸

徐炳

萬應杭州府志字仲孚海寧人嘉靖癸丑進士
授南刑部主事進郎中歷陞河南副使備兵大
名減供餉汰冗費裁省民兵濫額以休養魏人魏
人咸德之屬邊戍缺伍部使者出清查勾諸郡邑

令甚峻炳曰勾軍補尺籍無益戎備祇破民家又發閭左護之行兼亦破里乃入言部使者不便狀一道賴以全活轉山西布政司參政卒

謝教

於潛縣志字文載嘉靖戊午舉人授懷遠知縣遷忠州知州時宣慰土司馬得和擅據疆土教以大義責之遂還土地三十里歷撫州同知補任吉安同知興利除弊所在有循吏名遷淮府長史受遺輔幼歷著勞勸進階中順大夫以年老致仕

查志隆

石星查志隆傳號紹庭海寧人嘉靖己未進士授寧國司理刑清訟簡聲望蔚然丁艱服

闕補南駕部主事歷員外郎中出守皖城調保定旋晉天津兵備地多巨盜治事月餘雖夜行亦安堵又葺城隍復團兵功最著轉總儲山東卒

高汝梅

仁和縣志字子和嘉靖辛酉舉人令繁昌地濱江歲苦潦汝梅創築高塍植樹障隄又濬

陂池備山田蓄洩民永賴焉會丈田役興乃酌頒弓式令民履畝自報而單騎覆覈之臺監檄遠近為式課最遷福寧州守時悍卒以剋餉將變汝梅躬慰諭皆帖服以親老告歸

林梓

杭州府志字汝林仁和人嘉靖壬戌進士授中書舍人改刑部員外讞決多平反海忠介得罪

械繫梓持論得緩議歷郎中擢延平知府常俸外絲粟不染永安山漲衝沒民田八十里糧無出當事議加派取盈梓力陳不可凡七移牒往返撫按不能奪賦額得減訟訊不留行嘗曰四民皆有恒業一日稽留則一日失業矣陞雲南金騰副使謝病歸結廬菑嶺題曰從吾別墅足跡不入城市年八十七而終延平人追思不置崇禎十年祀名宦

錢立

兩浙名賢錄字守禮仁和人嘉靖乙丑進士授刑部主事調兵部復改工部汰冗剔姦以廉幹

聞歷員外郎中出知太平府時蕪湖盜剽闔稅守令執賈人誣伏立聞牘歎曰是非盜有司乃真盜矣悉解縱之授捕者方畧不決旬盜盡獲擢廣西副使備兵永寧適土夷爭田治兵相攻諸武吏請勦立不聽檄諭以禍福皆羅拜受命因法其一二首難者餘置不問所全活無算尋致仕歸

查志文

兩浙名賢錄字鳴周海寧人隆慶丁卯舉人選廬州府通判絕苞苴却稅羨嘗割俸代輸

贖鍰時河工告急當事檄治懷遠睢寧等處志文輒負畚鍤以身先之會雪甚役者墮指志文請便宜當事者利亟成不許乃私自散遣約以解凍而集工咸如期至感恩奮勵不督而成遷無為州守敘河功加廬州府同知仍管州事州治濱江患水志文不及上請即發粟以賑全活數萬又值大祲

郡守督稅急牒三四下復遣吏督促志文乃解印綬更阜帽請以身坐吏還報郡守乃止尋為忌者

所中遂解歸

金俸

福建通志杭州人萬歷初以鄉薦任汀州府司理執法平反民稱不冤署建寧篆時當丈量多

溢額俸定為四則上下均勻填還原額民甚賴之

高江

王在晉高江傳字襟之應冕子萬歷乙酉舉人選諸暨諭擢尹江西新城新俗澆漓巨猾善持

短長江以法繩其魁采風謠察疾苦條上十四事臺司著為令杜一切請謁賂遺及贖鍰奇羨嘗覽

訊牒有文某搗殺王女事一夕夢女跽訴詞惟駟斐二字江乃悟殺人者馬四非文也庭質果歟服

有婦誣人殺其夫坐辟久江閱爰書曰實婦殺之也脇骨已折安能行五里許而歸婦具服有理刑

欲中傷之即日移疾歸改教東光攝吳橋令篆大
璫盧受延之賞雪出貂裘衣之拂袖起會疾卒縣
令宋某入視含殮見一裘一葛竹牀練帷篋中止俸數金歎曰真清白吏也

查允元

江西通志字虞臯海寧人萬厯癸未進士歷
禮部郎中出為江西提學僉事再任江西參

政持守廉介蒞事六載始終不移遜國忠臣練子
寧八世孫練綺自福建長樂回原籍允元訪得之
給衣巾復給學租百石令奉祀
金川書院年未五十以疾乞休

錢養廉

杭州府志字國維仁和人萬厯己丑進士授
工部都水司主事管河夏鎮時汶泗諸水以

夏鎮為壑而昭陽諸湖在其下流養廉乃先從堤
旁開二支河以殺水勢又議於昭陽湖側鑿石通
道至徐邳以下出口則內水無壅闕而漕渠可百
年無事會以父喪去官後人卒用其議服闋召補

吏部考功署郎中事日本犯界尚書石星主和議
總督孫鏞不從星乃誣鏞通書幣下廷議養廉屬
草剖析極明和議止鏞亦無罪尚書孫丕揚以
清望用養廉非閣臣意丕揚去養廉亦奪官歸

楊廷槐

獻徵錄字祖植錢塘人萬歷乙未進士任浮
梁令邑景德鎮歲辦貢磁外供應諸司廷槐

一無所賦曰吾去日必不攜一磁以傷吾民也擢
刑部郎會楚獄妖書相繼起廷槐於中調護甚力
晉憲副備兵閩海忌者假大計中之左遷釅判稍
移南比部歷禮部出備兵徐淮議開駱馬湖以通
漕運徙徐州城以避河患改州為府以便控制併
淮徐道以一統體清沛縣妖黨以安反側尋調天
津津故魏璫鄉里先是監司有旬伏庭下者槐曰
吾自用吾法與平交一刺璫大不憚令璫私人李
明道出監漕勢張甚槐擒治其下隸遂以凍糧不
前罪槐削籍後璫敗復官再備兵徐淮築歸仁堤

停課稅行捐賑葺浮橋立軍營復河道善政不一而足者復中之竟拂衣歸尋調江西參政再除湖廣按察使俱不起

翁汝遇

翁汝進

杭州府志汝遇字子先仁和人萬曆戊戌進士授東莞令權蕪湖關

最後守朝歌俱有惠政所在尸祝弟汝進字獻甫萬曆乙未進士授興化令疏河四百餘丈東入海建四門石闕以為水防歷官至山東參議以忤逆璫罷歸

鄭圭

廣西通志仁和人天啓三年知平樂縣蒞任七載撫字催科有方捐鹽羨以助糧餉積公餘以

造浮橋庭無訐訟野無追呼陞去士民作逢年亭以寄思焉

郭正中

朱一是郭正中傳號黎眉海寧人天啓舉人選授山西代州知州未赴留京修厯在厯局

指斥時政皆人所不敢言出蒞代兼司理事治獄多平反期年決罰者僅二十六事尋與監司不合自劾歸後以薦起邊才為充東兵備副使單騎就道嚴清軍之法倣義倉之制撫流民練鄉勇勞來安集盜不敢犯史可法保舉監淮東諸路軍忤四鎮拂衣歸

陸運昌

陳子龍陸運昌傳字夢鶴錢塘人崇禎甲戌進士授永豐令豐地境垵又新被兵逋賦以

十萬計運昌將之任上書言永豐積逋十萬今臣之官當疾徵之耶抑縱之耶縱之則無以佐軍興按籍而誅慢令臣罪無赦疾徵之則民不堪命挺而走險非誅臣無以謝黔首罪亦無赦臣旦夕死等耳何忍因此一方民惟陛下幸哀憐之書奏帝下大農議遂蠲復焉視豐未二載以治行最遷吉水令吉田賦多乖紊邑民周正淑請於朝願履畝丈之事下所司運昌召正淑糾畫形便審度利害

并集文學弟子嗇夫司里雜議其所由廢興之狀
往覆辨難以十數民辭窮又爭言不文便運昌曰
凡前言當丈與今言不當丈者皆非知治體者也
於是核民實無田有賦其賦浮於田者皆上其數
取河壩棄地非民業者代其賦不及田者寧失輕
以加惠之具方畧上奏制曰可民咸樂業楚饒虔
廣寇大起攻宜春去吉僅百里運昌捐俸
築城樓櫓畢具賊亦不至以毋憂去官

張懋謙

江西通志字顧存錢塘人崇禎間知九江府
時張獻忠陷蘄黃蹂躪梅廣分掠九江界懋

謙多方防禦民得安堵無何饑饉洊臻疫癘交作
懋謙發粟賑救施藥療病築堤修閘事皆可紀

錢朝彥

杭州府志字殷求錢塘人崇禎丁丑進士知
句容縣蒞任數月有飾金珠偽為藥餌以獻

者立置之法歲饑民晝掠於市朝彥廉得其首
惡斃杖下民乃戢被誣調簡旌德遂投効歸

國朝

何元瑞

鄉賢留祀冊富陽人順治二年由貢生任安慶府通判職司漕務時民運軍運之議未定

百姓痛苦於輸輓元瑞以民運一定貽累非淺於撫軍前痛切言之遂著軍運為定制民得安業委署

桐城縣重士愛民輕徭減賦後以親老告歸

駱鍾麟

鄉賢留祀冊臨安人順治丙戌舉人丁亥會副任盤屋令時值淫雨渭河大決鍾麟禱於

神水不落願以身殉翌日河身他徙邑人立碑志異歸修邑乘建興梁歲饑鬻產捐賑

吳道煌

鄉賢留祀冊錢塘人順天籍順治己丑進士初任武康令補閭中皆有惠政以循卓擢禮

部郎出為蘇州知府錢塘縣志道煌守蘇州時新立駐防旋奉撤回以舟楫資裝不能具咸觀望不

即去道煌具屏屨集餼糧且曰太守為諸軍祖道
勿逗留獲愆千艘一夕發巨家被誣以家釀進發
之皆金珠也道煌力却之仍為雪其誣有以通洋
構大獄意在多株連道煌驗其所駕舶曰誣也海
舶必用巨木長數尋貫首尾名龍骨非此不能行
遠此獨無直民間小舟耳竟從末減去任後吳人
祠祀
虎邱

顧鼎銓

鄉賢留祀冊仁和人順治甲午舉人知山西
蒲城縣值兵燹之後百計招徠民皆復業歲

旱鑿石為渠以資灌溉又廉得巨猾素為閭里之
害置之法民曰較疏山引水之利更什伯也子祖

榮官內
閣學士

邵嘉

鄉賢留祀冊富陽人父啟元稟異姿過目成誦
行文雄博自成一家言嘉中順治乙未進士歷

督捕主事典試滇南督江南學政時每學入泮額止四名嘉每得佳卷不忍棄置即捐俸代為援例所歷學宮頽廢輒為修葺總憲魏象樞疏薦晉鴻臚寺少卿以終養歸

柴望

錢塘縣志字秩于仁和人順治丁亥進士由縣令歷廣東布政使萊州府志望守萊州遇水潦捐俸賑粥隣郡百姓襁負就食全活甚衆膠州牧與總鎮不協鎮兵譁望親往安撫始定創築城東濠隄士民德之名其隄為柴公隄

周甸

公舉事實字屆乎新城人順治丁酉舉人兩任學諭陞湖廣宜都知縣勤勸課革徭役慎聽斷絕差擾民咸便之會亢旱虔誠步禱甘霖隨沛後病卒官署合邑感泣

俞宣琅

公舉事實字雍來海寧人順治己亥進士由學諭轉大竹令邑經獻賊殘破居民鮮少宣

琅下車即稽戶口墾田畝招徠拊循靡不至先是邑令公膳籍編戶按月供億宣琅一切罷之疲民稍蘇歸籍者亦漸衆會以病卒貧不能返櫬邑民釀金送之柩始得歸

王典

河南名宦冊字備五仁和人康熙二十年由恩貢任湖南永興知縣經吳逆兵燹後招流亡開

荒蕪民以安集有虎為暴禱城隍神虎自斃於市以滇黔餽餉功調祀縣政尚寬仁不事鉤距孺子彭某誤傷人典察其情出之建社倉興義學公暇與諸生課藝多所成就卒於官祀名宦

何喬雲

錢塘縣志字令名號曾園錢塘人康熙丙辰進士授中書改桂東令初至計民口止六百

有奇城傾戶毀乃募流散給牛種具田器緩繇賦流亡漸復邑無書籍因發篋出所攜經史諸書召諸生曉文義者授之闢學舍聚徒講習請留貯學租佐膏火邑中戶聞弦誦聲楚南多雜派桂東代

鄰郡監司買米五百石轉運千里道險而費多民甚苦之商雲毅然不應具文白督撫上聞湖南州縣六十有三因商雲請得豁免者四十有二治桂東十二年行取以主事用請假歸

蔣德昌

公舉事實字聿修海寧人康熙壬戌進士授中書改屯田主事兼督兩窯值新建太和殿

綜理精密厯營繕都水員外郎擢刑部山西司郎中獄克允出為湖廣提學僉事矢公矢慎試牘不旁假恒夜分不寐年七十卒同官醺賄以歸諸生炷香泣送者數百里不絕

陳履升

鄉賢留祀冊錢塘人任浮梁巡檢景德鎮產磁器每一器必款識年代於下器損而字不

滅遂至棄擲履升通詳勒石禁止窯戶集金走賂求勿禁履升曰六書聖賢之寶可使狼藉冀壤中耶厲色却之錢塘縣志履升在浮梁時有為盜囊橐者令畏勢不敢問履升用計擒之置於法時閩

寇方平悍弁虐民履升列欵上之其人陰謀中履升既而悔曰陳君正人也敢不服且謝過焉

張曾裕

公舉事實字昆詒號容軒海寧人康熙戊辰進士授臨朐令濬木刀溝以通水利分四鄉

限以勸徵輸邑西南山僻常有盜為立保甲法時單騎巡緝至寒月尤厲年餘盜絕丁艱服闋補新樂縣縣故有社書取辦公事每歲一更例以鄉之富而愚者當之常破析家產曾裕知其弊乃擇每里知書算者面詢以充不願者聽退民踴躍稱便聽訟時無論巨細必溫辭絮語歎曲推究務得其情故雖加箠責不怨有劉某惑於後妻訟子不孝子懼而逃曾裕召其父諭以天性果悔泣子出服罪父為哀懇乞免又俗相沿畜異姓為子有孀婦曲庇其義子反控應繼之姪庭訊時以大義明白開曉婦亦泣謝而去擢吏部文選主事未數月改御史卒於官曾裕性坦易無厓畧讀書勵行至老

不衰尤好汲引後進遇一村一藝常稱之不容口卒之日聞者多為泣下

陳嵩

公舉事實字巨高海寧人康熙癸未進士授刑曹郎執法不阿有奸人怙豪家勢謀奪人婚力

為判完原配盜誣良民廉得其情釋之還卒斃人蘆溝橋或陰左右焉嵩不聽卒抵於罪遷儀部郎值高麗入貢使例有私覲峻拒之一無所受歸田後杜門守正當事不通一刺混迹村巷見者莫知為貴官也

楊宮建

公舉事實字千門海寧人由貢生任山東城武知縣邑為單邑上流堤河久塞不治兩邑

俱病宮建力請於大吏期與單邑同時修築瘠土遂成沃壤丁艱服闋補河南寶豐復疏鑿長渠備水澇豐人戴之曰楊公渠子存理癸未進士性孝友官刑部郎有能聲歷兵科給事中

楊中楠

公舉事實字公三海寧人康熙甲子舉人選授河南鹿邑知縣下車廉明子諒遭年饑民

有鬻妻子者惻然曰為令不能謀保聚奚撫字為乃捐俸代之贖邑地勢窪下民居常患水中楠開

渠濬河躬督畚鍤由是閭境無淫潞之患尋以病卒於任

汪泰來

公舉事實字陞交錢塘諸生好學工詩文康熙乙酉

聖駕南巡泰來迎鑾於尹山橋進詩冊
欽擢第一

召入內廷與纂修中辛卯順天鄉試壬辰特賜進士出身授廣東潮州府同知潮瀕海多盜且奸

販往往運米出洋泰來嚴行禁緝民始安堵管東西兩界鹽場發帑不假手胥吏赴場督收餘鹽不令利歸私販場課溢額革魚船規例禁踏勘供應以羨補前官之缺捐俸助屬吏之喪戊戌夏山水

陡發衝決北門外堤田廬漂溺泰來創議捐築躬先畚鍤不數月隄成潮民建祠立碑名曰汪公隄丁內艱歸服闋赴補卒於京邸有後山文集半舫詩梓行問世

邵錫光

公舉市實字克大仁和人遠平子康熙丙戌進士任江西新建知縣下車即革陋規減耗

羨又善決疑獄上官輒以旁邑事屬代讞清江縣何氏夫死族誣為氏毒其夫獄已具錫光奉檄覆檢傷在腎光曰此陰症也寃遂白貴溪楊胥妻為無賴子所私賄捕誣以盜錫光發其奸遂服丁內艱服闋補江南潁上縣調繁溧陽武生宋武潛謀不軌錫光以計擒之餘黨解散陞雲南祿勸州

知州卒於官

嘉興府

宋

趙汝能

弘治嘉興府志字公舉崇德人系出濮邸登紹興進士知秦之海陵歲歉民飢嘯聚為亂

人情洶洶汝能曰是非巡尉可辦即部勒弓手土兵設方畧直前當之擒捕百餘人其黨潰散罪渠魁餘悉末減連倅舒斬諸司多以滯訟委之剖析簡明號稱平允知鬱林州首興學校士風丕變調守全州歷浙西沿海議幕官至朝議大夫

謹按徐一夔崇德趙氏世譜序汝能贅居崇德占籍故崇德志之而常濬孫海鹽縣進士題名記汝能在三十九人之數海鹽圖經據之作海鹽人

徐綱

弘治嘉興府志字晞顏桐鄉人乾道八年進士出宰江陰歲旱隣境流移踵至綱先條畫利害

申請臺郡發廩分場便糶盡革吏奸全活甚衆入
除提轄文思院著史論百篇及邊防兵政十六事
以上之不報
力丐祠歸里

陳之綱

正德崇德縣志字仲宏登淳熙進士第令泰
之海陵政先惠愛聽訟明敏民頌廉平縣有

捍海堰綿亘數十里天聖間范文正公任西溪鹽
監日所築至是堤址賴關潮汐衝突浸害農畝之
綱請於郡修治勿憚寒暑躬董
其役視昔堅壯改知仁和縣卒

蔡開

正德崇德縣志字子明登淳熙辛丑第歷除監
六部門添倅平江旋知邵武郡山多田少歲入

不足支歲出例輸官租一石則帶糶四斗官寢求
羸民益困開至俾民自用槩糶價視時低昂白於
朝為定式盡杜增收之害未幾除武昌漕司尋改
漕江西屬郡旱歉捐漕計以濟所活不可勝計卒

官於

莫若冲

嘉興府圖記字子謙石門人知安吉吳江有聲除司農簿出知岳州時兵荒盜起若冲督

捕賑發境內帖然知全州漕司檄解軍糧州處湘源壤高易涸客舟聞裝糧絕不至若冲發官帑造

舟搬運率先諸郡明年靖江暴水民賴以濟除大理丞丐祠歸

莫若晦

正德崇德縣志字子明舉進士除守宜春始至承積蠹每事撙節盡蠲四邑宿逋數萬緡

以寬民力期年郡計稍舒乃新甯舍築城堞修浮橋百廢具舉役不告勞歷除工部郎中請外知徽

州改知嚴州致仕

沈木

萬歷嘉興府志石門人第進士宰石城汀冠猗邑豪熊子開等為冠鄉導巡尉司妄指同姓

者捕之木察其非是破械使捕子開等邑境遂安
守真定民有以田多賦少告訐其仇者木謂東西
無經界冒佔者衆不可勝詰亟懲遣之有建議籍
民所據官田為屯可以富國經制司委州根據株
連六七百家木曰此事行則變
生矣亟以前牘上之事遂寢

陳炳

嘉興府閘記字宜之石門人令上虞有西溪湖

石為記歲久豪右復據夏大旱民持網所刻石請
復湖豪右撓沮之炳奮曰令寧以罪謫去必不忍
畏避強禦委棄三鄉民命也卒浚復之百姓歌曰
前復湖張參政後復湖陳縣令與我衣食全我命
後除提轄
文思院卒

元

沈兼善

昌化縣志字達卿崇德人至正八年任昌化縣主簿蒞事明敏參政董搏霄敗斬黃冠於

昱嶺關兼善多協贊焉及冠平撫綏有道民深德之

明

丁豫

海鹽文獻志字叔寬洪武初以儒術聞幣聘入京召見問天下治否對曰盜賊已息但恐復生

願以安民為本稱旨授江西按察司僉事詳刑慎法澤被於民民頌之不衰

沈貴

河南通志字廷臣崇德人宣德中知汝州編民戶等級以均差役循行田里教民樹藝作陂堰

溉田民享其利以疾卒於官士民立祠祀之

呂聲

正德崇德縣志字廷和景泰甲戌進士知進賢縣至即咨民隱規利弊興學校成禮俗任滿民

相率請於朝得復仕歷十有三載冰蘖之操終始一致以治行陞太僕寺丞上馬政五事見採納成

化丁酉
引疾歸

姜諒

萬歷嘉興府志字用貞秀水人天順甲申進士歷遷南刑部郎中知漳州府龍溪漳浦田皆傍

海多瀉鹵乃築長堤凡一百八十六所又濬塘渠置社倉作義塚立鄉約惠郡中田賦為里胥乾沒飛射詭寄者多乃悉為斷理復其舊籍按戶計丁分為三等遇徭役酌量輕重授之民役視舊額減半以親老乞終養歸

梅江

兩浙名賢錄宣城梅聖俞之裔宋南渡後始居嘉興江登成化己丑進士授廬江令興利剔蠹

政聲藉甚士民畏愛之擢南御史時儲位未定大臣莫敢言江首疏力請上嘉納賜織金冬服奉命

清戎兩廣寬恤部伍招撫流移遷四川
僉事決疑獄數十事蜀人以梅鏡稱之

陸遠

萬歷嘉興府志字德毅秀水人成化乙未進士
知海州清修鯁介聽斷明允一日行部有旋風

三匝馬首遠疑有冤令吏卒邏察之見一人死樹
下折擔尺許貫其喉乃土人殺買牛者移尸於此
密擒之一訊而服於是訟衰
盜息擢廣東按察司僉事

陸愈

兩浙名賢錄字抑之平湖人成化乙未進士知
江都縣窮鄉下里靡不巡歷殆徧月召有年德

者鄉一人詢民利弊而興除之歲凶民多鬻子女
於江南愈捐俸出罰鍰贖以完聚者幾百人每新
穀未登輒發舊廩散之約秋成償而不取其息又
築邵伯堤教民鑿溝洫時潞洩以溉田旱澇不復
為患召拜監察御史出按西蜀下車鋤豪強斥貪
墨發奸弊風稜甚峻出成案之不能生者亡慮百

十數滿一載將代以
盛暑行炎鄉得疾卒

劉暉

海鹽縣國經字公奇成化甲辰進士選御史督兩淮鹽政兼治河道時兩浙山東水旱疏請賑

以鹽筴餘銀全活者甚衆高郵湖風濤不測時時壞漕艘暉乃築堤四十里別為裏河通漕名康濟河舟免覆溺擢廣東按察副使正德初請老

項經

橋李往哲初編字誠之嘉善人成化丁未進士授南福建道御史出為太平知府經一意撫循

流亡來歸者萬計移治臨江與袁筠諸郡接壤土寇剽逸出沒其間前有司率玩愒愒慮他變弗敢動經至立捕諸豪賊百八十人置之法一郡大治逾年臨江飢有司方請賑經曰民飢甚矣必請而賑是懸口以待斃也賑而弗請罪在太守於是發府庫金建和糴之法民賴以濟時監司督賦方急經

不奉命監司怒甚繼而歲大稔民入賦
恐後為諸郡最後以江西右參政致仕

吳昂

海鹽縣圖經字德翼起家進士令宜城廉介自
持改新建新建人困寧濠索租匿丁家山以拒

濠言民反宜速兵昂勿為動入山諭民立散歲
大飢官無儲粟昂立抽補法賑贍全活萬人歷官

福建參政古田礮盜起發兵躡捕
渠魁散其黨進右布政未幾致仕

陸鋹

兩浙名賢錄字克潛平湖人成化間由貢士授
程鄉知縣程鄉在山海間多劇盜鋹初至議者

皆以殄盜為急鋹謂與民未之恩信何遽勞民乃
新學舍以禮義勵諸生問民疾苦晝夜不息期年
之後始團練義勇間出勦寇斬捕常至千百盜賊
畏威慕化相約無犯程人構訟多以賂取勝鋹門
無私謁健訟者不得行訟遂息以母喪歸民號泣
攀轅者數千人出境而後返行至常山以哀毀致

疾卒平湖鄉賢實畧鉅性至孝父珪患癰吮之而愈母畏雷輒趨侍達旦不寐任程鄉為政廉肅程

鄉人立祠祀焉

卞諶

正德嘉善縣志字信卿以進士授廣信府推官決獄精當雖老吏不逮嘗經鉛山嶺道有卧屍

忽夜夢一人謂傭者為主所殺密訪其人得之遂伏辜郡稱神明

孫璽

嘉靖浙江通志字朝信平湖人正德戊辰進士知興化有惠政轉揚州府同知歲飢悉力賑救

全活以萬計終山西按察司僉事獻徵錄璽在揚州時值宸濠反攻安慶璽奉檄守儀真扼江之衝捕儀賓之為謀者與其黨十餘人武宗南巡璽署淮安守調發百出而人不知疲薊州銀冶盜嘯聚千餘乘利據險為患璽攝兵備選吏馳山寨榜示禍福各自縛詣璽罪其首餘遣復業及徙雲南分巡

洱海道麗江土官川蜀爭金沙江相讐殺璽會勘其事土官以金賂同勘者久伺璽卒莫敢賂由此解讐奉約束如故大同經兩亂後卒伍驕悍璽以僉事巡大同盡心撫馭人賴安堵會山西巡按以考察中之遂罷

錢琦

嘉靖浙江通志字公良海鹽人正德戊辰進士授盱眙縣流賊入境琦竭力戰守邑賴以全歷

陞臨江知府德政懋著調思南府尋請老歸檇李詩繫傳琦歷禮刑二曹永嘉爭大禮出疏示琦請署名琦不從自思南告歸築樓曰東白吟咏自適著臨江集公良詩選雋史測語行世

鍾梁

海鹽縣圖經字彥材正德中登第為刑曹郎嘗諫止南巡杖闕下幾死世宗嗣位錄其忠加俸

一級奉勅慮囚江南平反死者百三十餘人擢知濟南郡平萊蕪寇邵志多擒斬功改知南昌裁正

湖地賦役權貴斂戢丁艱
歸年僅四十即疏請致仕

張徽

萬曆嘉興府志字德卿秀水人正德辛巳進士
嘉靖初授大理評事會議大禮忤旨廷杖尋復

官進寺副奉命慮囚雲貴釋殊死以下百三十人
進寺正擢守南雄墾荒田籍流民開商市清軍屯

多著
惠政

錢朮

海鹽縣圖經字汝冲嘉靖癸未進士授威縣令
威賦厚薄不等版籍絲棼朮仿朱文公漳州圖

帳為則壤畫界雖勢有力者請寄不聽威有門丁
產三徭吏上下其手與奸市朮復就中裒益令適
平時河北三郡賦役咸苦不均父老開威法良便
爭請往均朮受臺檄遍歷旁邑盡均之惟內黃南
和樊尤甚獨留經理三月至今二邑民建祠祀之如
威民也滿七年丁艱歸即家擢工部主事未赴卒

馮汝弼

獻徵錄字惟良平湖人嘉靖壬辰進士為工科給事中奉命視光祿及盛甲劾巨璫數

人置於法中貴人憚之左遷常熟令築堤建閘丈田均賦事有便於民率先諸邑嚴辦摧知太倉州至則減供億除民所疾苦有劇盜聚江海間前守不能詰汝弼設方畧擒之復襲擊其黨轉揚州府同知遂歸值倭寇發海上往言於督府請城平湖躬畚鍤以先作者及寇至賴城守得全

沈鑾

萬曆秀水縣志字大新嘉靖乙未進士授興化府推官廉平不苛攝莆田邑篆海堤決時為田

患鑾令堅築石堤以絕風濤之險陞南虞部主事權稅蕪湖令商自籍其稅而上計時即以其籍往不更他籍胥吏不能為奸後陞江西按察副使備兵饒州計擒劇盜數十人卒於官

周崑

豫章書字孟登崇德人嘉靖進士授玉山知縣調進賢威惠並行邑有盜魁蹤跡詭秘崑偽為

出遊抵鄉捕得數其
罪杖殺之人稱神明

沈垣

獻徵錄字子完平湖人嘉靖乙未進士除大理評事歷寺正出知惠州府事至立斷務得民情

有李鑑者和平劇盜也糾羣偷負險出剽刼垣設方畧調兵餉遣人入巢諭禍福鑑自縛伏罪支附皆解散值歲祲發廩賑贍為平糶法通有無全活數萬人會郡有利病條上詣督府議途遇瘴卒於番鼎館舍

卜大同

獻徵錄字吉夫秀水人嘉靖戊戌進士授刑部主事歷湖廣按察司僉事督下江防按行

瑤俗去民所疾苦飭封守立里保令行期年羣盜屏息會海寇挾倭作難而闕為禍首時論推大同才擢福建巡海副使諸所興革咸與民宜賊知有備終其任三年弗敢犯所著有征苗圖記備倭圖

記

吳淞

萬歷秀水縣志字秀東嘉靖丙午舉人選知閩州戢苗獠使同編戶輸稅會山水驟漲民溺死

無算淞至懸賞格拯一人者與十緡又躬令人置筏以須未渡者貳守九江時湖口關值水衝商舶

多壞淞曰寧算錐刀而傷民命乎請於觀風使者議革之商大稱便已遷福建鹽運司同知引年歸

屠仲律

萬歷秀水縣志字宗豫嘉靖庚戌進士令弋陽遷廬州守時軍興浩費更以景府之國郡

邑騷然仲律一意節省費減他郡十之五歲大侵民多逋稅為出贖鍰代償又出積穀數十萬平糶

所全活甚衆以勞瘁歿於官

劉烱

兩浙名賢錄字元白海鹽人術之子術贅於錢從其姓烱始復為劉嘉靖庚戌進士除知金谿

縣考最稱治行第一擢南工部主事歷陞撫州府知府值鄰寇初退爇撫循瘡痍簡兵保穀又築崇仁樂安宜黃三城修千金堤民享其利進按察副使備兵福州山寇緣間鈔暴爇以計芟薙畧盡擢廣東右參政大盜曾一本出沒雷連間爇與俞大猷咸繼光等贊畫進止暨軍實爇功為多陞貴州按察使嘉禾徵獻錄貴初寄治土司無屬縣爇議省會之地不可孤置府治宜革程番府所轄貴陽移治會城為貴陽府而以其地設附郭新貴縣從之後降湖廣右參政徙廣西羅施道參議粵地介在溪谷蠻漢雜處省城兵力孱弱不足彈壓乃大閱簡士馬嚴整部伍妖人金雲峯挾米賊術作符書招納亡命簧鼓楚蜀黔諸大酋爇立誅之值張居正歸葬爇獨不往御史秦罷卒於家

范之箴

獻徵錄字從敬秀水人嘉靖乙未進士任行人陞工部郎中出知永州府時徭賊內訌官

軍屢潰之歲以計悉擒之兵備潘某欲張大其事以為己功遂多株連無辜者上其名且就戮之歲謁潘給之曰土寇陸梁罪固無貸但人心方洶洶不開釋一二恐為頑梗者藉口曷付之箴核實始置法潘許之事既下遂盡釋之潘大怒以為賣已疏劾之箴上察知其狀罷潘調之箴漢陽府遷雲南副使湖廣參政皆著勞績進雲南按察使致仕

陸相儒

兩浙名賢錄字大行嘉興人嘉靖乙未進士授工部主事出知延平府首行條鞭法為八

閩倡閩人稱便又勅義倉行鄉約興學右文郡大治擢貴州副使土寇拒命數載時議撫議勦無定畫相儒獨許其自新卒歸順以憂去服闋復補閩中會島夷入犯遣材官逆於海斬獲有功以疾卒於官

張應治

萬曆秀水縣志字體徵嘉靖壬戌進士擢南戶科給事中彈劾不避權倖如請正宮闈劾

遣巨璫邢保疏革南司禮監神帛皆人所難言者出為九江守首復軍餉議條鞭緝盜賊會江右大祲流民相攜入境應治以便宜發廩賑之全活甚衆萬曆初舉卓異陞清副使

馮敏功

獻徵錄字元卿汝弼子嘉靖壬戌進士授禮部主事歷員外郎中出為江西參議會浙兵

挾餉鼓噪敏功召其長恠以利害皆叩頭謝趣授餉以次屬於舟使一倖導之勒兵隨其後衆咸戢轉副使備兵徐邳是歲河溢睢寧新安間大小十餘決敏功晝夜并作凡所獨治南自曲頭集抵青田八十里北自陸灣至呂梁四十里所與監司曹郎雜治直河南岸堤九千丈茶城而上接曹單隄百六十里一切指畫皆可經久遷山東左參政抗議加口膠河俱不可開忤柄臣意自引歸言者交

薦起督漕於淮按視淮南邵伯等三河疏內河以通漕艘力任艱鉅致疾篤趣召同官囑曰內河誠便利然太逼湖隄易潰宜別為護隄不即數百里魚鼈矣遂瞑神宗朝贈太僕卿

王朴

萬厯秀水縣志字德純以貢授徐聞令邑故有珠池課中官恣溪壑為民患朴請罷之又有櫟

榔稅佐縣官廚傳往往入為橐中裝朴首革之著為令釋冤獄賑飢民立社學教民鑿渠溉田民肖像祠焉

葉朝陽

兩浙名賢錄字文榮秀水人嘉靖乙丑進士恂恂若書生及當事執法雖豪貴不能奪初

知信陽州首均田賦豪民不得相冒為奸晉工部虞衡司郎中司鑄錢中貴人索例弗與出治鐵冶歲有羨金數千絲毫無染尋陞常德府知府有劇盜張金者嘯聚洞庭殺掠官府乃以計殲其渠魁

餘黨悉散尋陞郎襄兵
備轉廣東參政致仕

倪壯猷

嘉禾徵獻錄字華芳平湖人隆慶庚午舉人知江浦縣江至邑可六十里往往漂沒為患

壯猷議開新河五十里涉者便之尋陞南刑部主事出為貴州僉事紅苗反上勸撫機宜尋擒苗首石阿四等遷雲南兵備副使黔國莊田私徵為民害壯猷請下郡縣代徵著為令沐藩亦不敢撓後歸年八十四卒

洪丞

兩浙名賢錄字維進平湖人隆慶辛未進士授陳州知州傳解京俵馬三百餘匹以折色代又

議處河北歲派驛費省民數千金報最擢駕部副郎攝治部事曹無閤索尋晉吏部選郎卒於官

許應達

嘉興府志字伯漸嘉興人隆慶進士知東平州廉聲大著調工部司權清江廠建議於老

堤外開越河總河難之應達言越河成則水性順
得報可身行河上布算周密四閱月而河成延袤
四十里費僅十二萬金而河堤鞏固又於瓜州創
屯船塢使艘自江入者曲折免風濤范家口裂三
百餘丈衆錯愕莫為計達曰塞之便功亦成未幾
改蘇松水利發留都帑金十萬治水首開吳淞凡
七十里次諸州縣支河又次田間小河及諸圍岸
津梁一歲而成費減所發之半以病歸起補昌平
卒

朱大雅

嘉禾徵獻錄字元渚桐鄉人萬厯己酉舉人
知祁門縣有監生某為人誣訟前令以其家

饒出之恐汚己名獄久未決大雅至立釋之數日
生來謁曰某有佳墨數圭欲以奉公大雅受之諸
子取墨磨視則赤金也以白大雅大雅召生責之
曰我所以出子首以我素廉謹不畏人議故也今

反以此相污耶立還之生謝罪持去入為大理評事以清直稱子萬鈞字潔湘崇禎舉人孫彝字聲

始成辛丑進士

夏九鼎

西江志嘉善人萬厯進士任安福縣撫民如子待士大夫以禮莫敢干以私時稱為夏鐵

耳

譚昌言

嘉興府志字聖俞嘉興人萬厯辛丑進士令常熟改知婺源縣故有金竺坦徑久廢行者

遶經芙蓉嶺險同蜀棧昌言闢新嶺號譚公嶺歷陞南車駕郎中時急令福藩之國詔需馬快船五艘期以閱日即發昌言如期立辦雖縣令與遼將李性忠有隙兵民阻闕致闕昌言身入遼營諭以禍福即傳箭而定卒贈太僕寺卿賜祭葬子貞默貞良俱進士

包鴻達

嘉禾徵獻錄號儀甫嘉興人萬曆庚戌進士任湘潭知縣值歲飢出粟賑濟全活甚衆更

為建倉積穀以備患湘潭風困於馬政及解運之役鴻達極力振刷洞悉幽隱役遂寢行取兵科給

事中未赴卒於官

胡士相

西江志字端甫平湖人萬曆進士知弋陽縣故多盜士相嚴保甲法盜風頓息歷官江

西參政分守湖西道奸民請開礦部檄至士相覆寢其事衆建魏忠賢祠獨持不可請蠲袁州積逋

建義倉修城堞興學校奉旨賜金增秩

沈萃禎

平湖縣志字衷中萬曆癸丑進士授工部主事權荊州關稅盡革諸小稅名目以羨金築

堤沙市以避水衝荆民稱沈公堤歷知蘇州府舉卓異陞福建副使備兵興泉紅夷犯銅山侵中左

萃禎即日移駐同安身冒矢石出奇兵撓之五閱月而就款轉本省參政以親老乞歸當守蘇時吳江令曹欽程賍私狼藉因列貪跡注下考及魏忠賢亂政欽程黃緣報復鐫萃禎三級崇禎元年起補湖廣參政歷陞福建按察使備兵福州時海盜巨測巡撫鄒維璉新任未習閩事投誠者意頗觀望開萃禎至皆曰沈公來吾屬無虞矣遂委心歸順尋陞湖廣右布政歸卒

劉泓

嘉禾徵獻錄字止澄海鹽人萬曆己未進士除營繕司主事奄豎崔文昇督兩淮鹽漕驕橫特

甚莫敢牴牾泓疏暴其害得旨撤回淮人德之陞兵部郎中出為淮徐兵備副使徐當河決之餘盜賊蜂起蕭碭間各聚眾數萬泓擒其渠帥散其脅服總河侍郎朱光祚深器之令開濬馬陵山駱馬河口等處皆有成績後致仕歸

吳麟瑞

績獻徵錄字在賢海鹽人萬厯己未進士授常州府推官轉南儀曹主事進郎中擢常鎮

兵糧道時武備積弛麟瑞力為振刷兵甲一新丹陽練湖淤四十餘年麟瑞以漕輓所闕且滋灌溉遂躬自程履畝計工民不告勞官不費帑績用以成移江西參政分守湖西道時流寇蹂躪三楚而湖西之袁州隣楚新發於寇麟瑞至即移駐袁州嚴戰守之備以故終任無患遷按察使尤以澄清為己任貪吏雖才必黜民有獄訟必親鞫不輕委之守令轉右布政請告歸及甲申之難感憤成疾卒

陸懷玉

平湖縣志字石含萬厯己未進士授工部主事晉郎中董三殿工竣例擢京秩因不謁魏

璫出知鎮江府廉靜嚴明郡大治陞湖廣武昌道轉鹽法參政商民戴德建祠祀之觀察山左出殊

死數十人尋擢閩省右轄謝病歸周贈親戚不干
郡邑事子祚蕃成進士歷貴州參政循績著聞能

濟美

云

袁黃

嘉興府志字了凡嘉善人萬歷進士授寶坻
令縣賦煩重具疏乞減上從其請陞主事卒

鄭心材

海鹽縣國經字敬中以王父曉廕為督府都
事歷應天治中南都劉天緒之獄本以白蓮

教聚眾無兵仗左驗訛言謀反訊者欲借為功心
材止案坐渠首取天緒所募籍悉焚之全活甚眾
署上元篆定浦口渡值掣驗江鹽卻諸商例餽
及歸修家規立宗法置義田後人奉為家誠焉

曹履泰

嘉禾徵獻錄字大來海鹽人天啟乙丑進士
知同安縣時海寇紅夷交江羣盜盤踞同安

無兵履泰編漁民為伍團結村落互相應援賊不
敢犯督撫熊文燦受李魁奇鄭芝龍降芝龍部下

卒橫行輒以法繩之未幾魁奇挾鍾斌叛去履泰乃陰搆斌使叛魁奇而復說芝龍招斌遂與芝龍合圍魁奇斬之行取授吏科給事中疏糾吏部李希揆躡等典銓希揆喉大璫王永祚使誣履泰下獄論戍嶺南應天巡撫祁彪佳疏訟其冤補行人司副不赴子元方崇禎進士

馬家植

嘉禾徵獻錄字培元平湖人崇禎甲戌進士知武進縣申布條教積弊肅清以治行第一

行取吏科給事中屢有建白甲申奉勅督餉江西福建以與馬士英不合謝事歸

高承埏

舊嘉興府志字寓公嘉興人崇禎庚辰進士授遷安令鋤豪強招流散設法濟急餉省費

萬計改江南涇縣數月政成民有清高之謠遷工部主事上書白父道素之冤即乞養母歸涇人奉祀水西王文成書院承埏藏書數萬卷博學強記雖簿書鞅掌不廢涉覽所著有稽古堂集

國朝

陸濬睿

平湖縣志字以愚號未菴順治丙戌舉人授宣化府推官宣府古上谷地軍民雜處頗稱

難治前官皆用法繩之睿獨以寬察重囚鞏加世段大康性全等之冤出之獄所拔士皆一時雋去

塞外士習為之振起

陸世楷

公舉事實字英一又字孝山平湖人順治五年以選貢生除平陽府通判甫至姜瓖搆亂

平陽被圍世楷登陴固守百日旋誘降其魁釋其黨師後大飢人相食世楷為粥給飢者全活甚眾

遷同知登州府海寇揚帆猝至立設守具率舟師禦之寇逸去時叛帥海時行剽掠州縣獨戒勿犯

境登有嫠婦夜為人所殺隣里訐其媳世楷時攝縣事察其冤禱於城隍神卒得殺人者遷知南雄

府時平南靖南兩藩並駐廣州有入始興山自稱
平藩侍衛發民鑿礦世指曰王雖尊不得擅役吾
民今不使太守知詐也縛送廣州平藩不敢問人
點僧暱於藩倚勢為虐世指計縛之斃諸杖築天
峯書院課諸生講學以外艱去郡老稚遮道不得
行立祠府治東士民春秋社祭服闋補思州未幾
以病引歸

魏學渠

鄉賢留祀冊號青城嘉善人順治戊子舉人
授成都府推官時蜀中初定戶口尚少民疲

於差役學渠招撫綏輯事事得宜舉博學宏辭陞
刑部主事歷官江西分守湖西道加意撫綏務從
寬簡其俗生女多溺死者嚴為之禁生全者甚衆
嘉興府志學渠在蜀定嘉眉邛雅四州賦額公私
便稱

鄭龍光

廣東名宦冊字韜生平湖人順治己丑進士任南雄府知府時藩帥初克城龍光以廉介

見憚剔奸除蠹扶弱存孤民倚賴之嘗履畝省荒過五斗嶺前有虎負岬衆莫敢進龍光曰昔劉昆為治虎北渡河今太守以勸農入山虎曷為而來哉叱馭驅之虎隨遁去以一童二僕自隨客投謁無所拒至其家見其清素無敢私請者歷任六年擢西寧副使

郁之章

福建名宦冊字衷恒嘉善人順治己丑進士十年以分巡道駐上杭時海寇入漳聲言來

攻人情驚恐之章靜持之密約城守張國棟整飭營伍趣通邑士民集演武廳手自草檄以忠義激發士民咸願効死賊知有備而退人謂章寸管賢於萬鎡也

查培繼

鄉賢留祀冊字王望海鹽人順治壬辰進士除廣東東莞知縣有政聲歷兵戶刑三科給

事中疏章數上如清閹弊行官覓禁鷹戶等疏皆
關國計出為江西按察副使分巡饒九南道時寇
亂初靖培繼力事拊循尤以興學校敦教化為首
務建義塾禁淫祀慎蘆課扞水患拯飢民捐俸修
白鹿洞書院時與諸生
講學興賢育才造就實多

沈棻

嘉興府志字子佩平湖人順治壬辰進士授西
平知縣初下車值歲大歉民多流亡棻設法招

徠給牛種諭以歲豐取償免其息其貧民完稅無
金錢者許以布粟代又歲募河夫多逋逃棻按貧
戶之逋稅者充役民喜得食且以工價完逋爭先
赴工工易竣甲辰飛蝗徧野獨不入西平境三年
邑大治以勞瘁卒
官士民建祠祀之

曾王孫

鄉賢留祀冊字道扶嘉興人順治戊戌進士
為漢中司理改令都昌入為戶部主事轉員

外進刑部郎中官至四川提學道散厯中外所至有聲其在秦則均賦役興水利平棧道理冤獄在豫章則安集流亡興崇學校及官提學道杜絕苞苴釐正文體蜀人稱之

鍾朗

鄉賢留祀冊字玉行石門人父景音慷慨好施力行善事朗中順治己亥進士選翰林改工部

主事出視江南蘆政蘆故奸猾弊藪強弱輸賦不等積逋至二十萬時方遣使者督令清丈朗偕使者按籍履畝確查得豪富侵佔胥吏飛灑等弊陳請豁免貧戶積欠數萬兩厯刑部郎中陝西提學道嚴絕苞苴振興文教陞布政司參議致仕

沈鱣

福建名宦冊字木門嘉善人順治辛丑進士康熙八年知建安縣事兵燹後土田荒蕪蠹胥巧

為影射民苦之鱣廉得實窮治不少貸先是藩廝以錢貸窮民勒息數私禁榜掠有孀妻孥以償者

官莫能制鯁曰愛一官而脅於輿隸
使民無告吾恥焉捕置之法民大悅

沈廷勸

鄉賢留祀冊字克齋秀水人由貢生授新寧縣令時兵燹之後戶不滿百廷勸輕刑薄賦

招徠撫字民相率來歸再令樂城值三逆之變出師南征廷勸轉輸供給無有匱乏尋改商州知州
以疾歸

俞雲來

嘉興府志字漢乘海鹽人康熙庚戌進士授安仁令時當兵燹隨大兵招降賊朱天錫等

數十人全活閩廣諸郡飢民甚衆調任湖口擢兵馬司正指揮

朱振

鄉賢留祀冊字千仞嘉興人康熙己未進士知舒城縣均賦役嚴保甲舒有七門堰者壅塞已

久下流苦旱振力排衆議卒興其利民咸德之

虞兆清

鄉賢留祀冊字鑒斯嘉興人康熙己未進士知綦江縣綦當兵火之後邑里蕭條兆清招

徠勸墾戶口日增建學宮設義學延師以教士官至湖廣道御史弟兆淦有詩名

孫衍

鄉賢留祀冊字宰工嘉善人康熙甲子舉人選長山知縣在任五年減羨耗賑貧乏以病乞休

邑人攀轅卧轍者相望於道

陳霆萬

鄉賢留祀冊字子敦嘉善人康熙甲戌進士授臨朐縣息盜安民四境肅然邑正供四萬

餘兩向有胥蠹私收包納之弊甚至飽壑遠遁累民重完霆萬至一變其法散歸業戶使各自輸糧

其弊送革

張王典

鄉賢留祀冊字堯若嘉善人康熙丁丑進士授山西平順縣下車之始減耗費絕苞苴省

差徭善良安堵奸邪屏迹值歲當編審秉公釐剔
從前隱漏之弊重役之苦一時頓清報最陞吏部
主事旋擢吏科給事中宦京七載賃屋數間僅可
容膝公餘則焚香玩易以圖補過及卒行李蕭然
惟圖書數束

徐升貞

湖南名宦冊字君階海鹽人由拔貢補岳州
通判蔬食布衣官居如貧室盡革陋規歲旱

步禱淚痕被面兩釋
冤獄人號活命菩提

許涓

嘉興府志字臨洲康熙庚辰進士知湖廣石門
縣苗蠻雜處涓開誠撫諭諸土司咸格心向化

巡撫趙中喬保奏內召卒於途居官十
五年家無寸椽尺土歿後人益信其廉

陸張烈

公舉事實字昂千海鹽人康熙庚辰進士山
西浮山令抵任即謝餽遺除浮耗歲早倡輸

賑粟民無失所者力振文教童子試漸增至數百人詳請改小學為中學治訟口決如流獄無留繫行取授吏部文選司主事官至兩廣運使

王顯一公舉事實字立峯海鹽人康熙丙戌進士選

詞訟興文學在任五月調赴西寧委解羊餉銀至古木額爾格軍前如期交納及歸復委至鎮海堡地方收放草束顯一躬自料檢不假手胥役鎮民德之上官嘉其才遂留軍前効力委解鹽菜銀至古木額爾格軍營又令收放各郡解到倉糧料豈顯一辦理精明効力三載刻無寧晷庚子春奉派運糧至木魯烏蘇地方兼程而進先期至軍主兵者深嘉之即令其沿途放糧回西寧行至第十八臺積勞成疾而卒雍正元年凱旋撫臣核實奏績特廕一子入監

蔣鶴鳴

公舉事實秀水人為舒城知縣舒自明以來水道淤塞田多旱患鶴鳴下車即講求濬治

捐俸勸輸士民樂助是歲適遭荒歉即令貧民受役不三月開久湮之河七十餘里民不告勞

工亦速竣

浙江通志卷一百六十七